

Pablo Corintocjārārē ojamu'tāca pūrī ni'i

A'ti pūrī a'tiro weero ojanopā nise ni'i

Pablo Jesucristore ējōpeorā Corintocjārārē ojacu niwī. Cū ojacaterore Éfesopu nicu niwī. Cūta Corintocjārārē ne waropure Jesucristo ye quetire were, cūrē ējōpeori curuacjārā sājācā weecu niwī.

Titare cū Jesucristo ye quetire bu'esijanucāca be'ro puati wa'aro weecaro niwū.

Topure judío masā nerēwuaropu bu'ecu niwī. Cūrē topu nigūrē cō'awīrōcā'cārā niwā. Titare Corintocjārā me'rā ni'cā cū'ma ape cū'ma deco tojacu niwī.

Be'ro Corintocjārārē cū bu'e'quere queoro weeticā tu'ogu, a'ti pūrīrē ojacu niwī. Cū ojawaronojōta añudutinucācu niwī. Yapatigupua Judeacjārā pajasecuorārē weetamuse cjasere, cū basu de'ro weeatjere ucūyapaticu niwā.

Pablo Corintocjārārē oja'que ni'i

¹ Yu'u Pablo, Sóstenes me'rā musārē añudutili. Cū quē'rā Jesucristore ējōpeogu marī acaweregu nimi. Ō'acū cū uacaronojōta yu'ure Jesucristo ye quetire weredutigu besecūcu niwī. ² Yu'u a'ti pūrīrē musā Corintopu nirārē oja'a. Musā Jesucristore ējōpeorā Ō'acū ya curuacjārārē oja'a. Musā Jesucristo me'rā nīrā, Ō'acū yarā ni'i. Ō'acū musārē cū yarā niato nīgū besecu niwī. Nipe'tirocjārā Jesucristore ējōpeorārē tojo besecu niwī. Jesucristo nipe'tirā cūrē ējōpeorā wiogu nimi. Tojo nicā marī wiogu nimi.

³ Ō'acū marī pacu, tojo nicā Jesucristo marī wiogu musārē añurō weeato. Musārē ejerisājācā weeato.

Õ'acũ Jesucristore ějõpeorãrẽ weetamuse ni'i

⁴ Mũsã Jesucristore ějõpeorã niyucã, Õ'acũ mũsãrẽ añurõ weecu niwĩ. Cũ tojo weesere i'agũ, cũrẽ e'catise o'onu'cũ'u. ⁵ Mũsã Jesucristo yarã niyucã, Õ'acũ mũsãrẽ cũ ye cjase nipe'tise añusere o'ocu niwĩ. Tere o'ogu, mũsãrẽ cũ yere añurõ masĩcã weecu niwĩ. Āpẽrãrẽ mũsã cũ ye quetire añurõ wereturiacã weecu niwĩ. ⁶ Yũ'ũ "Cristo mũsãrẽ añurõ weegũsami", niwũ. Cũ yarã sãjãcã, yũ'ũ nĩ'caronojõta wa'awũ mũsãrẽ. ⁷ Tojo weerã mũsã Õ'acũ o'osere cõope'ocã'a. Marĩ wiogu Jesucristo a'tiatjere yucueri curare Õ'acũ mũsãrẽ o'ose da'sawe'e. ⁸ Cũ tutuasere mũsãrẽ o'onu'cũgũsami. Cũrẽ ějõpeocã weenu'cũgũsami. Téé a'ti mũmũco pe'ticãpũ tojo weedu'ugũsami. Tojo weerã marĩ wiogu Jesucristo a'ticã, bu'iri marĩrã nirãsa'a. ⁹ Õ'acũ cũ nĩ'quere queoro weemi. Cũta mũsãrẽ besecu niwĩ. Cũ macũ Jesucristo marĩ wiogu me'rã añurõ nidutigũ besecu niwĩ.

Pablo Corintojãrãrẽ "A'merĩ dũcawatiticã'ña" nĩ'que ni'i

¹⁰ Acawererã, Jesucristo dutiro me'rã mũsãrẽ a'tiro nigũti. Mũsã nĩ'cãrõnojõ wãcũña. Mũsã ucũse me'rã dũcawatiticã'ña. E'catise me'rã a'merĩ ucũña. Nĩ'cãrõnojõ wãcũ nisetiya. ¹¹ Yũ'ũre Cloé wãmetigo ya wi'icjãrã mũsã a'merĩ i'asĩ'rĩtise quetire werewã. ¹² A'tiro werewã: "Masãnũcũ mejẽcã dia'cũ wãcũsetiama", niwã. Mũsã a'tiro ucũaporo: "Õsã Pablo ya curuacjãrã ni'i." Āpẽrã "Apolo ya curuacjãrã", "Pedro ya curuacjãrã", tojo nicã "Cristo ya curuacjãrã ni'i", niaporo. Tojo weerã no'o ģaro wãcũma'acã'poro. ¹³ Tojo wãcũticã'rõũa'a. Marĩ Cristore ějõpeorã ni'i. Tojo weerã ni'cã curuata ni'i. Marĩrẽ dũcawaase marĩ'i. Yũ'ũ Cristo niwe'e. Mũsã ye niatjere curusapũ wẽrĩbosatiwũ. "Pablõre ějõpeorãrẽ wãmeyeno'rõsa'a", nino'ña marĩwũ. ¹⁴ Õ'acũrẽ e'catise

o'lo'o. Crispo, tojo nicã Gayo dia'cūrẽ wãmeyegu, queorota weewu. ¹⁵ Pãjãrã musãrẽ wãmeyecã, a'tiro nibopã: “Pablo cã wãme me'rã ãsãrẽ wãmeyewĩ”, nibopã. Tere nírã, yu'ure ãjõpeorã weebopã. No'opuacã tere weetiwu. ¹⁶ Estéfnas ya wi'icjãrã quẽ'rãrẽ wãmeyewu. Æpẽrãma wãcũnemotisa'a. ¹⁷ Yu'ure Cristo wãmeyedutigu cũutiwĩ. Cã musãrẽ yu'rũose queti pe'ere yu'ure weredutigu o'ówĩ. Tere weredutigu, masã añurõ na wãcũme'rĩse paca me'rã weredutitiwĩ. Yu'u tojo wrecãma, Cristo curusapu wẽrĩsere wãcũtibopã. Masã yu'rũono'tibopã.

Õ'acũ tutuasere, cã masĩsere Cristo me'rã masĩno'o nise ni'i

¹⁸ Jesucristo ye queti a'tiro ni'i. Cã marĩrẽ yu'rũosĩ'rĩgũ, curusapu wẽrĩcu niwĩ. Tereta Jesucristore ãjõpeotirã pecame'epu wa'ajã a'tiro nisama cã wẽrĩ'quere: “Tojo nima'acãrõ wee'e”, nisama. Marĩ cã yu'rũono'cãrã pe'ema Cristo curusapu wẽrĩ'que queti añuse ni'i. Te queti me'rã Õ'acũ tutuasere ĩ'ano'o. ¹⁹ Õ'acũ ye queti ojãca pũrĩpũre a'tiro ojano'wũ:

Æpẽrã “Ûsã masĩrã ni'i”, nirãsama.

Na tojo ucũsere pe'ticã weeguti.

Na tu'omasĩsere tuumajãminũ'cõcũti, nicu niwĩ Õ'acũ.

²⁰ Tojo weerã “Masĩpe'ocã'a” nirã mejõ nirã tojama. Tojo nicã ãpẽrãrẽ na wãcũsere bu'eri masã quẽ'rã mejãrõta tojama. A'ti mũco cjasere ucũme'rĩrã quẽ'rã mejãrõta tojama. A'te, a'ti mũco cjase na “Tu'omasĩ'i” nisere Õ'acũ a'tiro weesami. Tere mejõ nise waro wa'acã weesami. ²¹ Õ'acũ nipe'tisere masĩmi. Tojo weegu cã a'ti turicjãrãrẽ na tu'omasĩse me'rã cūrẽ masĩcã weeticu niwĩ. A'tiro pe'e uacu niwĩ. Na Jesucristo ye quetire tu'orã, na ãjõpeocã, “Narẽ yu'rũoguti”, nicu niwĩ. Cūrẽ ãjõpeotirã pe'e te quetire tu'orã, “Tojo nima'acãrõ wee'e”, ni wãcũcãrã niwã.

1 CORINTIOS 1:22 4 1 CORINTIOS 1:31

²² Judío masã Õ'acũrẽ ãjõpeose ðuporo a'tiro nisama: “Õ'acũ tutuaro me'rã wee'ocã ï'atojarãpu dia'cũ ãjõpeorãti”, nisama. Judío masã nitirã griego masã pe'e quẽ'rã a'ti turicjãrã na wãcũme'rĩsere ãjõpeoma. ²³ Ûsã pũrĩcã Cristo curusapu wẽrĩ'cu ye quetire were'e. Judío masã tere tu'orã, tu'satisama. Judío masã nitirã quẽ'rã te quetire tu'orã, “Tojo nima'acãrã weema”, nisama. ²⁴ Marĩ Õ'acũ bese'cãrãrẽ no'lo judío masãrẽ, judío masã nitirãrẽ Jesucristo ye queti ni'cãrõnojõ ni'i. Marĩ Cristo curusapu wẽrĩse me'rã a'tiro masĩ'i: “Õ'acũ tutuagu, masĩyu'rũagu nimi”, ni'i. ²⁵ A'ti ãmucocjãrã Õ'acũ weesere tojo weema'asere weronjõ wãcũma. Niwe'e. Õ'acũ weese pe'eta masã masĩse nemorõ niyu'rũnu'cã'a. Apeye Õ'acũ wee'quere tutuatĩsere weronjõ ï'ama. Niwe'e. Cũ wee'que pe'eta masã weese yu'rũoro tutuanemo'o.

²⁶ Acawererã, musãrẽ Õ'acũ beseatji ðuporopu niseti'quere wãcũña. Musã pejetirãcã a'ti turi cjasere masĩrã waro niwũ. Pejetirãcã wiorã niwũ. Pejetirãcã wiorã acawererã niwũ. ²⁷ Cũ a'ti turi cjase masĩrãrẽ bopoyadutigu na “Tu'omasĩtirã nima” nirãnojõrẽ besecu niwĩ. Tojo nicã tutuarãrẽ bopoyadutigu tutuatirã pe'ere besecu niwĩ. ²⁸ Cũ mejõ nirã masã yabino'rãrẽ besecu niwĩ. Cũ tojo weecã, wiorã mejõ nirã tu'oña'to nĩgũ tojo weecu niwĩ. ²⁹ Tojo weegu Õ'acũ ï'orõpu ne ni'cũ “Yu'u ãpẽrã yu'rũoro masĩyu'rũnu'cã'a”, nímasĩtisami. ³⁰ Musãrẽ Õ'acũ basuta Jesucristo yarã sãjãcã weecu niwĩ. Tojo nicã Cristo me'rãta marĩ masĩse cuo'o. Cũ me'rãta tja Õ'acũ marĩrẽ “Na añurã, yu'rũono'cãrãpu nima”, ni ï'asami. Marĩ cũ yarã ni'i. Tojo weegu marĩ pecame'epu wa'abo'cãrãrẽ yu'rũweticã weecu niwĩ. ³¹ Tojo weero Õ'acũ ye queti ojãca pũrĩpu oja'caronjõta ni'i: “Ni'cũ ‘Ãpẽrã yu'rũoro niyu'rũnu'cã'a’ nisĩ'rĩgũ, niticã'to. Tojo wãcũrõnojõ o'ogu, marĩ wioogu pe'ere ‘Tutuayu'rũgu nimi, marĩrẽ

añubutiaro weecu niwĩ, niato”, ni ojanowũ.

2

Cristo curusap wẽrĩ'que queti ni'i

¹ Yũ'u musã tiropũ Õ'acũ ye quetire weregu etagu, a'tiro weewũ. Pacase ucũse di'apaca me'rã masã na masĩse me'rã weretiwũ. ² Yũ'u musã tiropũ nígũ, a'te dia'cãrẽ wãcũnrũwũ: “Jesucristo ye queti, tojo nicã cũ curusapũ wẽrĩ'que dia'cãrẽ weregutĩ”, ni wãcũwũ. ³ Yũ'u musã tiropũ nígũ, mejõ nigũ tu'oña'wũ. Apetero yũ'u te quetire queero weretibosa'a nígũ, narãsäcũcãti. ⁴⁻⁵ Yũ'u musãrẽ ëjõpeocã uagu, masĩrã ucũwũase me'rã ucũtiwũ. Õ'acũ tutuase, cũ masĩse o'ose me'rã ëjõpeoato nígũ ucũwũ. Tere ucũgũ, Õ'acũ tutuaro me'rã, Espĩritu Santu me'rã pe'e ëjõpeocã weewũ. Musãrẽ masã wãcũwũaronojõ tu'o ëjõpeocã uatiwũ. Tojo weegu tojo werewũ.

Õ'acũ cãrẽ masiãto nígũ Espĩritu Santure o'o'que ni'i

⁶ Tojo nimirã, apeterore ãsã a'tiro wee'e. Jesucristo añurõ ëjõpeorãma pacase masĩse paca me'rã were'e. Te masĩse paca a'ti turi cjase mejẽta ni'i. Tojo nicã wiorã a'ti turicjãrã ye mejẽta ni'i. Na masĩse maata pe'tirosa'a. ⁷ ãsã a'tere ucũrã, Õ'acũ ye pe'ere ucũrã wee'e. Cũ masĩsere, masĩno'ña marĩmi'quere, masã ne waro tu'oti'quere ucũ'u. A'ti turi weese ðaporo Õ'acũ te ya'yio'quere “A'tiro weeguti”, ni wãcũyutojacũ niwĩ. Marĩrẽ yũ'rũoatjere, marĩ u'musepu ninu'cũatjere wãcũyucũ niwĩ. Tereta ucũ'u. ⁸ Ne ni'cũputa a'ti turicjũ wiogu a'tere tu'omasĩticũ niwĩ. Tu'omasĩrã pũricã, Jesucristo marĩ wiogu añuyũ'rũagũre curusapũ wẽjẽtibopã. ⁹ Õ'acũ ye queti ojãca pũrĩpũre a'tiro pe'e ojanoo: Õ'acũ cãrẽ mairãrẽ añuse apoyucũ niwĩ. Na i'ati'que, na tu'oti'que ni'i.

Na ne cã'rõ wãcũma'ati'que ni'i, ni ojano'o.

¹⁰ Te añuse marĩ masĩti'quere Õ'acũ Espíritu Santu me'rã marĩrẽ masĩcã weemi. Espíritu Santu nipe'tise di-asayurũnũ'cãsere Õ'acũ cã weesere masĩpe'ocã'mi.

¹¹ Marĩ apĩ cã wãcũsere masĩwe'e. Cã se'saro cã wãcũsere tu'oña'sami. A'te weronojõ Espíritu Santu se'saro Õ'acũ cã wãcũsere masĩmi. ¹² Marĩ a'ti mũmucocjãrã Jesucristore ãjõpeotirã weronojõ wãcũwe'e. Õ'acũ marĩrẽ Espíritu Santure o'ocũ niwĩ. Tojo weerã cã weronojõ wãcũse cũo'o. Cã me'rã nipe'tise Õ'acũ marĩrẽ o'o'quere masĩ'i. ¹³ Æsã a'tere ucũrã, Espíritu Santu bu'e'que mũseri me'rã ucũ'u. Æsã basu masĩmũjãti'que me'rã mejẽta ucũ'u. Tojo weerã mũsã Espíritu Santure cũorã cũrẽ cũorãrẽta bu'e'e.

¹⁴ Espíritu Santure moogũ a'tiro weesami. Õ'acũ ye cjasere, Espíritu Santu bu'esere mũatisami. “Tojo ni-ma'acãrõ wee'e”, nisami. Espíritu Santu me'rã marĩ Õ'acũ yere masĩ'i. Tojo weegũ cũrẽ moogũ Õ'acũ yere “Tojo nirõ wee'e”, ni tu'omasĩtisami. ¹⁵ Espíritu Santure cũogũ pe'e nipe'tise bu'esere “¿Queoro niti?” ni besemasĩpe'ocã'sami. A'tiro weegũre Espíritu Santure moogũ pe'e cã weesere besemasĩtisami. ¹⁶ Õ'acũ ye queti ojãca pũrĩpũ a'tiro ojano'caro niwũ: “Ni'inojõta ne ni'cũ marĩ wioğũ wãcũsere masĩtisami. Ne Õ'acũrẽ ‘Tojo mũa'a' ni, dutimasĩtisami”, ni ojano'wũ. Tojo nimicã, marĩ pe'e Cristo me'rã nĩrã, cã wãcũsere masĩ'i.

3

Pablo “Æsã Õ'acũrẽ da'racõ'terã nĩ'i” nise ni'i

¹ Acawererã, mũsã Espíritu Santure añurõ yũ'tirã weronojõ nitiwũ. Tojo weegũ mũsãrẽ diasasere wereta basiotiwũ. A'tiro pe'e weewũ. Mũsãrẽ diasatise di-a'cũrẽ werewũ. A'ti turicjãrã Espíritu Santure moorã

weronojō niyucā, tojo weewu. Musā Cristo ye cjasere añurō ējōpeotiwu. Tojo weegu musārē wī'marārē ucūgū weronojō werewu. ² Wī'marā a'tiro weesama. Ōpērī du'utirā, ōpēcō dia'cū mi'rīsama. Narē ba'asere ecatisama. Bu'ese ba'ase ecase weronojō ni'i, nisī'rīrō wee'e. Wī'marārē ōpēcō mi'orō weronojō musārē a'tiro weewu. Musārē diasatise bu'icjasere bu'ewā'cōwū. Yu'u diasasere musārē bu'ecāma, pōtēoti wācūejatibopā. Mejārōta ni'cārōacārē yu'u pacase pacare bu'ecā, tu'otibosa'a. ³ Musā Jesucristore ējōpeotirā weronojō ni'i yujupu. Musā a'merī ho'o. A'merī ī'asī'rīwe'e. Tojo weerā Jesucristore ējōpeotirā a'ti turicjārā weronojō wee'e. ⁴ Musā a'tiro ucū'u: “Yu'u Pablo ya curuacjū ni'i.” Apī “Yu'u Apolo ya curuacjū ni'i”, nisa'a. Tojo nīrā, a'ti turicjārā weronojō ucūrā wee'e.

⁵ Yu'u, Apolo me'rā ūsā mejō nīrā ni'i. Ō'acūrē da'rawā'ñaco'teri masā ni'i. Tojo weerā ūsārē “Na ya curuacjārā ni'i”, niticā'ña. Ūsā werese me'rā musā marī wioḡu Jesucristore ējōpeowu. Ūsānucū Ō'acū weredu-ti'quere werewu. ⁶ Yu'u ne waro musārē werewā'cōwū. Ni'cū otese ducare oteḡu weronojō weewu. Be'ro Apolo musārē bu'ennemopeocu niwī. Otesere aco pio'cu weronojō weecu niwī. Ō'acū pe'e tere pī'rī bu'cuamujācā weecu niwī. Tere wéégū, musārē nemorō ējōpeocā weecu niwī. Nemorō cū waro weecā weecu niwī. ⁷ Otese ducare oteḡu, tojo nicā aco piogū mejō nīrā nima. Ō'acū pūrīcā tere pī'rīcā weegū cū waro nimi. ⁸ Weremu'tā'cu, be'ro cūrē bu'esirutugū quē'rā ni'cārōnojō nima. Ō'acū nánucūrē queoro na wee'quere wapayegusami. ⁹ Ūsā Ō'acū yarā ni'i. Cūrē ni'cārōnojō da'racote'e. Musā cū da'rari di'ta weronojō ni'i.

Tojo nicā wi'i cū yeewā'cārī wi'i weronojō ni'i. ¹⁰ Yu'u Ō'acū weetamuse me'rā musārē bu'éḡu, a'tiro

weewu. Wi'li nu'cōme'rĩrĩ masũ weronojō masārē añurō bu'enũ'cāwũ. Āpērā masārē bu'enemorā, ti wi'ire weeturiamujārā weronojō weerā weema. Ti wi'ire yapada'reosĩ'rĩrā, añurō weerũa'a. ¹¹ Ō'acũ masārē yu'rũodutigũ Jesucristore cūucũ niwĩ. Cũ ni'cũta masārē yu'rũogũ nimi. Yu'u masārē te quetire bu'enũ'cāwũ. Ne apĩ, Ō'acũ tojo cūunũ'cā'que Jesucristo ye quetire dũcayumasĩtisami. ¹² Wi'ire wéerā, a'tiro weeno'o. Uru, platanojō me'rā, ũtāperi wapabujuse me'rā yeebu'ipeono'o. Āpērā yucũ me'rā, pũrĩ me'rā, ārũpagũ me'rā weemasĩno'o. A'te weronojō ni'cũ añuse warore masārē bu'ebosami. Apĩ mejō nise maata pe'tisere bu'ebosami. ¹³ A'ti mũcũco pe'ticā, Ō'acũ nánũcārē na bu'e'quere bajuyoropũ besegũsami. Ni'cũ urure pecame'epũ besegũ weronojō weegũsami. ¿Na añurō o ña'arō pe'e bu'epari? nĩgũ, tojo weegũsami. ¹⁴ Ni'cũ āpērārē añurō bu'eturiamujā'que ninu'cũcā'rōsa'a. Ni'cā wi'li ũtā wapabujuse me'rā yéeca wi'li ũjũtiro weronojō ninu'cũrōsa'a. Ō'acũ cũ da'ra'quere wapayegũsami. ¹⁵ Apĩ añurō bu'eturiawā'cātigũ pe'ere cũ bu'e'que pe'tia wa'arosa'a. Pũrĩ me'rā wéeca wi'li weronojō ũjũdija wa'arosa'a. Cũ ti wi'li ũjũrĩ cura du'tiwijaa'cũ weronojō nigũsami. Cũ ye nipe'tise ũjũpe'tia wa'arosa'a. Cũ ni'cũta pecame'epũ wa'abo'cũ yu'rũwetigũsami.

¹⁶ ¿Musā masĩweti? Musā Ō'acũ wi'li weronojō ni'li. Espĩritu Santu masāpũre nimi. ¹⁷ Musārē “Ō'acũ wi'li weronojō ni'li” nĩrō, cũ yarā waro ni'li, nisĩ'rĩrō wee'e. Tojo weegũ Ō'acũ cũ yarārē dojorēcā weegũre pecame'epũ bu'iri da'regũsami.

¹⁸ Musā basu a'tiro wācũma'aticā'ña: “Yu'u a'ti mũcũcocjārā wācũwũaro weronojō masĩyu'rũa'a”, niticā'ña. A'tiro pe'e niña. “Ne masĩtisa'a”, niña. Tojo ucũgũ pũrĩcārē Ō'acũ masĩgũ waro wa'acā weegũsami.

¹⁹ A'ti umucocjārã na “Tũ'omasĩ'i” nise Õ'acũ ĩ'orõpũre tojo weema'ase ni'i. Õ'acũ ye queti ojãca pũrĩpũ a'tiro ni ojanowũ: “A'ti turicjārã na masĩse me'rã ‘Weerãti’ nirãrẽ Õ'acũ na wãcũsere tuumajãminũ'cõcã'sami”, ni ojanowũ.

²⁰ Aperopũ quẽ'rãrẽ Õ'acũ ye queti ojãca pũrĩpũre a'tiro ojanemonowũ: “Marĩ wioğũ a'ti umucocjārã wãcũsere masĩmi. Na masĩsere ĩ'agũ, ‘Mejõ nise ni'i’, nisami”, ni ojanowũ. ²¹ Tojo weerã mũsãrẽ bu'egũre “Åpẽrã yũ'rũoro nimi”, niticã'ña. “Yũ'ũ Pablo ya curuacjũ ni'i”, niticã'ña. Õ'acũ mũsãrẽ añurõ wa'acã ãagũ, a'tiro weecũ niwĩ. Nipe'tisere o'ocũ niwĩ. ²² Yũ'ũre, Apolore, Pedrore mũsãrẽ weetamudutigũ o'ócũ niwĩ. Tojo nicã a'ti turi cjasere, marĩ catisere o'ocũ niwĩ. Apeye, wérĩca be'ro catinu'cũatjere o'ocũ niwĩ. Nipe'tise mũsã ye ni'i. ²³ Apeye quẽ'rãrẽ mũsã Cristo yarã ni'i. Tojo nicã Cristo quẽ'rã Õ'acũ yagũ nimi.

4

Jesucristo ye quetire wererã na weeseti'que ni'i

¹ Ûsãrẽ mũsã a'tiro wãcũrõũa'a. “Cristore da'rawã'ñaco'teri masã nima”, nirõũa'a. Ûsã Õ'acũ ye queti todũporocjārã masĩti'quere wereco'terã ni'i.

² Marĩ da'rase cũorã, marĩ wioğũ duti'caronojõta queoro weerõũa'a. Tojo weecã, marĩrẽ ãjõpeosami. ³ Mũsã yũ'ũre “Pablo Õ'acũ cjasere añurõ da'rami” nicã o niticã, sõ'owaro wãcũque'tiwe'e. Mejãrõta wiorã na besewũaropũ miacã quẽ'rãrẽ, wãcũque'tiwe'e. Yũ'ũ basu waro quẽ'rã besewe'e. ⁴ Yũ'ũ da'rasere ña'arõ tũ'oña'tisa'a. Tojo nimigũ, “Te añu ni'i”, nímasĩtisa'a. Marĩ wioğũ dia'cũ yũ'ũ weesere besesami. ⁵ Tojo weerã åpẽrã wee'quere beseyuticã'ña. Marĩ wioğũre yucueya. Cũ a'tigũ, nipe'tise masã masĩti'que ya'yioropũ ní'quere bajurẽğũsami. Masã na wãcũrõpũ “A'tiro weegũti” ní'que

quē'rārē ī'ogūsami. Ti n̄m̄m̄ nicā Ō'acū nán̄m̄cū añurō weeseti'quere “Queoro añurō weew̄m̄”, nigūsami.

⁶ Acawererā, añusere m̄sārē m̄asā'a. Tojo weeḡm̄ Apolo, yu'̄m̄, ūsā ye cjase me'rā m̄sārē queose o'oap̄m̄. Ūsā weronojō ni'cārō me'rā niato nírā tojo weeap̄m̄. Ūsā weesere ī'acūuña. Tojo wéérā, m̄sā Ō'acū ye queti ojáca pūrīp̄m̄ nírōnojōta weerāsa'a. Ti pūrīp̄m̄ dutítisenojōrē yu'r̄uoquejosome. Tojo nicā “Ūsārē bu'leḡm̄ pe'e masīȳm̄r̄un̄m̄'cāmi m̄sārē bu'leḡm̄ yu'r̄uoro”, nisome.

⁷ M̄sā āpērā nemorō añurā niwe'e. Masīȳm̄r̄un̄m̄'cārā niwe'e. Nipe'tise m̄sā c̄uose Ō'acū o'o'que dia'cū ni'i. Cū o'óca be'ro nimicā, to pūrīcārē ĵde'ro weerā m̄sā basu boca'caro weronojō tu'oña'ti? ⁸ M̄sā a'tiro wācū'u: “Nipe'tisere c̄uope'ocā'a, ñe'enojō d̄s'awe'e”, nisa'a. Ūsā top̄m̄ nitiri cura m̄sā wiorā masīȳm̄r̄un̄m̄'cārā weronojō tu'oña'sa'a. “Nipe'tisere masīpe'ocā'a”, nisa'a. Tojo nírā, ūsā pe'ere tojowaro ī'acō'asa'a. M̄sā diacjūta wiorā nicā pūrīcārē, añuȳm̄r̄uabosa'a. Ūsā quē'rā m̄sā me'rā wiorā nitamubosa'a. ⁹ Yu'̄m̄ a'tiro pe'e tu'oña'a. Ō'acū ūsārē Jesucristo besecúú'cārārē nipe'tirā docap̄m̄ mejō nírā mejārā cūu'caro weronojō tu'oña'a. Ūsā wējēcō'ano'ajā weronojō ni'i. Nipe'tirā, a'ti di'tacjārā, m̄'m̄m̄secjārā ūsā p̄'eticā ī'asama. ¹⁰ Cristo ye quetire werecā, a'ti nucūcācjārā ūsārē “Tu'omasītirā nima”, nisama. M̄sā pe'e “Cristo ye quetire masīpe'ocā'a”, nisa'a. Ūsā m̄sā ī'acāta, tutuawe'e. M̄sā pūrīcā “Ūsā tutuarā ni'i”, nisa'a. Masā ūsārē tojo ī'acō'acā'ma. M̄sā pe'ere wiopesase me'rā ī'asama. ¹¹ Ne warop̄ta ūsā p̄'etin̄m̄'cāwū. Ni'cārōacā quē'rārē tojota yapaticā'a. Ūjaboa'a, acow̄uo'o, su'ti moo'o. Masā ūsārē tārāpéma. Wi'i ūsā ya wi'i waro moo'o. ¹² Ūsā ba'asī'r̄isenojōrē, ūsā su'ti s̄n̄asī'r̄isenojōrē duusī'r̄irā, a'tiro wee'e. Ūsā basu

1 CORINTIOS 4:13 11 1 CORINTIOS 4:21

urputu da'ra pi'eti'i. Masã ùsãrẽ ña'arõ ucũcã, narẽ ùsã pe'e "Añurõ wa'ato", ni sërĩbosa'a. Ùsãrẽ ña'arõ weecã, tojo tu'oña'cã'a.

¹³ Masã ùsãrẽ ña'arõ ucũcã, narẽ añurõ me'rã apome'rĩcã'a. A'ti umuco cjase na cõ'a'que, na uatisere weronojõ ùsãrẽ ï'ama. Ne waropu tojo yabinu'cã'cãrã mejãrõta yabinu'cũma tja. ¹⁴ Músãrẽ bopoyadutigu mejẽta oja'a. Músãrẽ yu'u ma'ígũ, yu'u põ'rãrẽ weronojõ queoro wãcũcã uagu wereme'rĩcã'a.

¹⁵ Músã pãjãrã diez mil Cristo ye quetire bu'erã cuorã, cuomasĩ'i. Tojo pãjãrã cuota basiomicã, ni'cũta nisami músãrẽ weremu'tã'cu. Te Jesucristo masãrẽ yu'ruogu a'ticu niwĩ nise quetire yu'uta weremu'tãwũ. Músã te quetire tu'orã, cũrẽ ãjõpeonu'cãwũ. Tojo weegu yu'u músã pacu weronojõ ni'i. Músã quẽ'rã yu'u põ'rã weronojõ ni'i. ¹⁶ Tojo weegu músãrẽ a'tiro weecã u'a. Yu'u weesetisere ï'acũu weesirutuya. ¹⁷ Yu'u tere uasãgũ, Timoteore músã tiropu o'ógũ wee'le. Cũrẽ ma'i'i. Cũ yu'u macũ weronojõ nimi. Marĩ wiogu yere queoro weenu'cũmi. Yu'u Cristore ãjõpeogu weesetisere cũ músãrẽ weregusami. Yu'u nipe'tirã Cristore ãjõpeorãrẽ, nipe'tiropu nirãrẽ were'quenojõrẽta weregusami. ¹⁸ Ni'cãrẽrã músã a'tiro wãcũsa'a: "Ùsã ãpẽrã nemorõ añurõ weeyu'runu'cã'a", nisa'a. Tere nĩrã, "Pablo a'tisome", ni wãcũsa'a.

¹⁹ Yu'u pe'e "Õ'acũ uacã, maata músã tiropu wa'aguti", ni wãcũ'u. "Topu wa'agu, na tojo ni ucũrãrẽ ï'agũti", ni'i. Te se'sarore ï'asome. "¿Na Õ'acũ tutuase me'rã weetina?" ni ï'agũti", ni'i. ²⁰ Õ'acũ wiogu nise a'tiro ni'i. Cũ uaro, cũ tutuaro me'rã weecã uami. Ucũse ueri me'rã dia'cũ yu'ticã uatimi. ²¹ ¿Ñe'erẽ uasari músã? ¿Yu'u músã tiropu wa'agu, ña'arõ weese wapa músãrẽ tu'ticã uasari? ¿O añurõ weese wapa pe'le ma'ise me'rã

wereme'rĩcã ɥasarine?

5

Ña'arõ weegure cõ'awĩrõdutise ni'i

¹ Musã ye queti a'topɥ busutu'o'o. Tere tu'ogɥ, tu'omarĩawũ. A'tiro tu'o'o. Ni'cũ musã me'rãcjũ cũ pacɥ nuorẽ'core ẽ'ma, numotiapɥ. A'tiro weesere Ô'acũrẽ ẽjõpeotirãputa ne weetima. Ña'ayũ'rua'a. ² Musã “Ãpẽrã nemorõ añurõ weeyũ'runũ'cã'a”, ¿niti yujupɥ? Bɥjawetironojõ o'orã, musã bɥjawetitiwɥ. Bɥjawetirã pũrĩcã, cũrẽ cõ'abopã. Musã me'rã nerẽnemodutitibopã. ³ Yũ'ɥ a'topɥ nimigũ, yũ'ɥ wãcũse me'rã musã tiropɥ nĩgũ weronojõ tu'oña'a. Tojo weegɥ cũ ña'arõ weegure musã me'rã nigũrẽ “Cõ'arõɥa'a”, nitoja'a. ⁴ Marĩ wioɥ Jesucristo dutiro me'rã musãrẽ nerẽduti'i. Yũ'ɥ quẽ'rã yũ'ɥ wãcũsepɥ musã tiropɥ nitamugãti. Marĩ wioɥ Jesú quẽ'rã cũ tutuase me'rã musã tiropɥ nigũsami. ⁵ Musã tojo nerẽrã, pacɥ nuorẽ'core numotigure cõ'acã'ña. Wãti cũ upɥre de'ro weesĩ'rĩgũ weeato nĩrã tojo du'ucã'ña. Tojo weecã, cũ upɥ pi'etirosa'a. Tojo pi'etigɥ, cũ ña'arõ weesere du'ubosami. Cũ tojo wéeca be'ro marĩ wioɥ Jesú a'ti turipɥ a'tigɥ, cũrẽ yũ'ruogɥsami.

⁶ Ña'arõ weegú musã wa'teropɥ nisami. Tojo weerã “Ûsã pe'e ãpẽrã yũ'ruoro añurõ weeyũ'runũ'cã'a”, niticã'ña. Ña'arõ weesere nipe'tirã pẽ'rĩpejatawio ni'i. ¿Musã a'tiro niwɥasere masĩweti? “Pá wéerã bucuato nĩrã levadura wãmetisere morẽsama. Na cã'rõacã morẽca be'ro te nipe'tiropɥ se'sa wa'asa'a”, nino'o. A'te weronojõ masã na ña'arõ weesere pẽ'rĩpeja wa'asama. ⁷ Tojo weerã pẽ'rĩpejari nĩrã, te ña'ase dojorẽsere cõ'acã'ña. Tere cõ'arã, musã añurã tojarãsa'a. Judío masã Pascua bosenuɥ duporo pá bucuase me'rã morẽ'quere cõ'asama. Ti bosenuɥrẽ morẽña marĩse dia'cũrẽ

ba'asama. Te weronojō müsã a'tiro weerãsa'a. Ña'ase doxorēsere cō'arã, pá morēña marīse weronojō tojarása'a. Añurã tojarása'a nitiroma, añurã nitoja'a. Cristo cū basuta marī ña'arō weesere cō'agũ wējēno'tojacũ niwĩ. Cū Pascua nicã oveja na wējē'cũ weronojō nimi. ⁸ Tojo weerã toduporo ña'arō weeseti'quere du'uroña'a. Diacjũ weesooro marĩrō weesetiroña'a. Ña'arō weesetiro marĩrō nirōña'a.

⁹ Yũ'u toduporo ojamũ'tãca pũrĩpũ a'tiro ojawũ. “Nuniarē a'metārãbajaque'atirã me'rã ba'patiticã'ña”, ni ojawũ. ¹⁰ Yũ'u tojo ojagũ, “A'ti turicjãrãrē ba'patitibutiãcã'ña”, nigũ mejēta weewũ. A'ti turipũre no'o ñaro weeri masã nima. A'metārãrĩ masã, ñaripejasebucurã, yajari masã, Õ'acũ mejētare ējōpeoma'arĩ masã nima. Yũ'u tojo nibutiaca be'ro nicãma, müsã no'o wa'arã wa'abopã. ¹¹ Yũ'u a'tiro pe'e niwũ: “No'o 'Jesucristore ējōpeo' o' nimigũ, ña'arō weegũ me'rã ba'patiticã'ña. A'metārãgũnojōrē, ñaripejagũnojōrē, no'o queose yee'quere ējōpeoma'agũnojōrē ba'patiticã'ña. Tojo nicã ña'arō tu'tisepijagure, que'asebucure, yajari masũrē ne ba'patiticã'ña. Ne cã'rō na 'Jesucristore ējōpeo' o' nimirã, ña'arō weerã me'rã ba'aticã'ña”, niwũ. ¹²⁻¹³ Yũ'u Jesucristore ējōpeotirãrē bu'iri da'rewe'e. Õ'acũ cū basu narē bu'iri da'regusami. Mũsã pũrĩcã müsã me'rã nirãrē na ña'arō weecã, bu'iri da'reya. Õ'acũ ye queti ojãca pũrĩ oja'caronojōta weeya. A'tiro ojano'wũ: “Ni'cũ müsã wa'tero nigũ ña'arō weegure cō'awĩrōña”, niwũ. Tojo weerã cũrē cō'acã'ña.

6

Jesucristore ējōpeorãrē mejēcã wa'acã, weresãtirãta a'merĩ apoya nise ni'i

¹ Jesucristore ãjõpeorã na me'rãcjãrã me'rã uarãnojõ a'tiro weesama. Beseri masã Jesucristore ãjõpeotirã tiropu besedutirã wa'asama. Tojo weeticã'rõua'a. Musã me'rãcjãrã Jesucristore ãjõpeorãrẽ besedutiroua'a. ² Musã masisa'a. A'ti turi pe'tica be'ro Jesucristo yarã a'ti turicjãrãrẽ beserãsama. Musã a'ti turicjãrãrẽ beserãsama nãrã, to pũricãrẽ ¿de'ro weerã a'teacãrẽ besemasĩweti? ³ ¿Musã masĩweti? A'ti umuco pe'ticã, marĩ Ô'acũrẽ wereco'terã umusepu nimi'cãrã quẽ'rãrẽ beserãsa'a. Tojo beserãsa'a nãrã, a'ti umuco cjase musã du'saso'quema tjãsa'a. ⁴ A'ti umuco cjase mejõ nise me'rã musã a'merĩ ua'a. Teacã me'rã uarã, a'tiro wee'e. Musã beseri masãrẽ “Mejõ nirãnojõ nima” nimirã, na tiropu besedutirã wa'a'a. ⁵ A'tema musãrẽ bopoyato nĩgũ tojo ni'i. ¿Musã wa'teropure ne ni'cã masĩgũnojõ a'tere beseacju marĩbutiati?

⁶ Nicãma, cãrẽ besedutironojõ o'orã, Jesucristore ãjõpeotirã tiro pe'e musã me'rãcjãrãrẽ weresãrã wa'a'a. Tojo weecã ¿añu niti musãrẽ? ⁷ Musã basu a'merĩ uarã, tojo weema'acãrã wee'e. Musãrẽ ña'arõ weesere tojo tu'oña'cã, nemorõ añubosa'a. Narẽ weresãrõnojõ o'orã, na yajasere ya'yiosãrã, tojo tu'oña'cã'ña. ⁸ Musã basuta Jesucristore ãjõpeorã musã acawererãrẽ ña'arõ wee'e. Na yere yajasa'a.

⁹ ¿Musã masĩweti? Ña'arõ weerã Ô'acũ tiropu wa'asome. Musã wãcũma'aticã'ña. A'tiro wéerã, umusepũre wa'asome. Ma'mapjia no'o uaro a'metãrãbajaque'atirãnojõ wa'asome. No'o queose yee'quere ãjõpeoma'arãnojõ wa'asome. Numotirã, marãputirã ãpẽrãrẽ a'metãrãbajaque'atirãnojõ wa'asome. No'o umua basu ña'arõ weerãnojõ, numia basu ña'arõ weerãnojõ umusepu wa'asome. ¹⁰ Tojo nicã yajari masã, uaripejasebucãrãnojõ, que'asebucãrã,

tu'tisepijarã, weesoose me'rã yajari masã Õ'acũ tiropu wa'asome. ¹¹ Toduporopure musã ni'cãrãrã a'tere tojota weeseticãrã niwũ. Ni'cãrõacãrẽ acobojo, ducayuno'cãrãpu ni'i. Õ'acũ yarã ni'i. Marĩ wiogu Jesú me'rã, tojo nicã Espíritu Santu me'rã Õ'acũ musãrẽ “Añurã nima”, ni'ĩ'asami.

Marĩ upu Cristo ya upu ni'i nise ni'i

¹² Masã a'tiro ucũwãasama: “Marĩ weesĩ'rĩsere no'õ hãro weemasĩ'i.” Tojota ni'i, nĩrõ pe'e. Apeye marĩ weesĩ'rĩse marĩrẽ weetamutisa'a. Marĩ hãro weegu wee'e nĩgũ, tere tojo weewã'ñaticã'rõhã'a. ¹³ Apeye na ucũwãase diacjũ ni'i. A'tiro ni'i: “Ba'ase añu ni'i paagare. Paaga pe'e ba'asãaja ni'i.” Õ'acũ pe'e a'te puaropure pe'ticã weegusami. Apeye pe'e diacjũ niwe'e. Õ'acũ upu wéegu, a'metãrãbajaque'atiati upure weeticu niwĩ. Marĩ ya upu Jesucristo hãro weeati upu ni'i. Cũ ti upu wiogu nimi. ¹⁴ Õ'acũ cũ tutuaro me'rã marĩ wiogu ya upure masõcu niwĩ. Cũrẽ masõ'caronojõta marĩ upure masõgũsami.

¹⁵ ¿Musã masĩweti? Musã ya upu, Cristo ya upu me'rã a'mesu'a'a. Marĩ tojo ni'i nĩrã, Cristo ya upure a'tiro weeta basiowe'e. A'metãrãwapata'ari masõ ya upu me'rã ti upure a'mesu'ota basiowe'e. ¹⁶ ¿Masĩweti? Õ'acũ ye queti ojãca pũrĩpu a'tiro ojano'wũ: “Umu, numio me'rã nĩgũ, na puarã nimirã, ni'cã upu weronojõ tojasama”, ni ojano'wũ. Tojo weerã musã ña'agõ me'rã nĩrã, ña'arã tojasa'a. Co me'rã ni'cã upu dojorã weesa'a. ¹⁷ Ni'cũ Jesucristo marĩ wiogu me'rã a'mesu'agu pe'ema, na puarãputa ni'cã upu dojo, ni'cã wãcũse cuosama.

¹⁸ Ne ãpẽrãrẽ a'metãrãbajaque'atisere wãcũma'aticã'ña. Apeye marĩ ña'arõ weesere sõ'owaro marĩ upu me'rã weetisa'a. Marĩ a'metãrãbajaque'atirã pe'e, marĩ upu warore dojorãrã wee'e. ¹⁹⁻²⁰ ¿Musã masĩweti? Marĩrẽ

Õ'acũ Espiritu Santure o'ócũ niwĩ. Marĩ ya upũ Espiritu Santu ya wi'i ni'i. Tojo weerã marĩ upũ me'rã no'o ɥaro weemasĩwe'e. Jesucristo marĩrẽ ma'ígũ, cũ yarã niato nígũ wẽrĩ wapayecũ niwĩ. Tojo weerã marĩ upũ me'rã Õ'acũ cũ ɥaro pe'e weemasĩ'i. A'tiro weecã, ãpẽrã cũrẽ añurõ wãcũrãsama.

7

Nũmotise cjase ni'i

¹ Ni'cãrõacãrẽ mũsã sãrĩtiña'o'oca pũrĩrẽ yũ'tiguti. Nũmotiticã, marãpũtiticã añucã'a, añurõ pe'e. ² Tojo nimicã, topũre pãjãrã ãpẽrã no'o ɥaro a'metãrãbajaque'atisama. Tojo weerã ɥmũa nãnũcũ nũmotiroũa'a. Nũmia quẽ'rã nãnũcũ marãpũtiroũa'a. ³ Ɛmũ cũ nũmo me'rã añurõ nisetiatio. Co quẽ'rã cũ me'rã mejãrõta nisetiatio. ⁴ Marãpũtigo a'tiro niticã'to: “Yũ'ɥ ɥaro weegoti”, niticã'to. Co marãpũ niyucã, “Cũ ɥaro weegoti”, niatio. Nũmotigu quẽ'rã “Yũ'ɥ ɥaro weeguti”, niticã'to. Cũ nũmo niyucã, “Co ɥaro weeguti”, niatio. ⁵ Co a'tiro weeato. Co marãpũ co me'rã nisĩ'rĩcã, yũ'tiatio. Cũ quẽ'rã core yũ'tiatio. Õ'acũrẽ ñubuerãtirã, ticuse nũmũrĩ “Marĩ weewũaronojõ weeticã'rã” ni apõca be'ro pũrĩcã tojo weeticã'to. Ñubuetu'ajaca be'ropũ todũporo niseti'caronõjõta marãpũ me'rã, nũmo me'rã niatio tja. Tojo weeticã, wãcũtutuaticã, wãtĩ mũsãrẽ ña'arõ weedutibosami. ãpẽrã me'rã no'o ɥaro a'metãrãma'acã weebosami.

⁶ Yũ'ɥ mũsãrẽ a'tere dutibutiase weronõjõ ucũgũ mejẽta we'e. Mũsã tojo weesĩ'rĩcã, añurõsa'a nígũ, tojo ni'i. ⁷ Yũ'ɥ a'tiro wãcũ'u. Yũ'ɥ mũsã nipe'tirãrẽ yũ'ɥ weronõjõ nũmo marĩrã nicã ɥamisa'a. Õ'acũ pe'e masãnũcũrẽ na weepõtẽoatjere cũucũ niwĩ. ãpẽrãrẽ nũmo marĩdutigu o marãpũ marĩdutigu cũucũ niwĩ. ãpẽrã pe'ere nũmotidutigũ, marãpũtidutigũ cũucũ niwĩ.

⁸ Ni'cārōacā mūsā nūmo marīrārē, marāpū marīrārē, wapewia numiarē nigūti. Mūsā yu'u weronojō nūmotiticā, marāpūtiticā, aňu ni'i. ⁹ Ūmua numia me'rā nisī'rīrā nūcātīrānojō nūmotiatio. Numia quē'rā mejārōta marāpūtiatio. Na nūmoticā, marāpūtīcā, nemorō aňu'u. Na numia me'rā, ūmua me'rā nisī'rīrā, pi'etiticā'to.

¹⁰ Yu'u marāpūtīrārē, nūmotīrārē a'tiro duti'i. A'te marī wioģu dutise ni'i. Yu'u tere wereturia'a. Numio co marāpūre cō'aticā'to. ¹¹ Cō'agō pūrīcā, apī me'rā nūorētīcā'to. Marāpū nīmī'cu me'rā apotigo, ni'cōta tojato. Ūmua quē'rā mejārōta cū nūmorē ne cō'aticā'to. Cū quē'rā cū nūmo nī'co me'rā apotīģu, mejārōta tojato.

¹² Āpērāma, yu'u Jesucristo besecū'cu nīgū, yu'u wācūse a'tiro nigūti. Te wācūse marī wioģu yu'are bu'e'que mejēta ni'i. A'tiro nigūti. Ni'cārērā mūsā Jesucristore ējōpeotīģore nūmotibosa'a. Co mū'u me'rā ninu'cūsī'rīcā, cō'aticā'ňa. ¹³ Mejārōta ējōpeotīģure marāpūtīģo quē'rā mū'u me'rā cū ninu'cūsī'rīcā, cō'aticā'ňa. ¹⁴ Na mūsā me'rā nise ye bu'iri Ō'acū narē aňurō weesami. Tojo weerā mūsā pō'rā Jesucristore ējōpeotīrā pō'rā weronojō nitisama. Ō'acū mūsā pō'rārē aňurō weesami. ¹⁵ No'o Jesucristore ējōpeotīģu cū nūmorē cō'asī'rīģūnojō pe'e cō'ato. Jesucristore ējōpeotīģo quē'rā co marāpūre cō'asī'rīģōnojō cō'ato. Ō'acū marī āpērā me'rā a'mequēse marīrō nisetīcā ūami. Na cō'asī'rīcā, aňurōsa'a. ¹⁶ Cō'ano'ģō “Yu'are cō'aticā, yu'u marāpūre Jesucristore ējōpeocā weemasībopā”, nita basiowe'e. Cō'ano'ģū quē'rā “Yu'are cō'aticā, yu'u nūmorē Jesucristore ējōpeocā weemasībopā”, nita basiowe'e.

¹⁷ Tojo nimīcā, a'tere yu'u nīpe'tirocģārā, Jesucristore ējōpeori curuacģārārē duti'i. Mūsānūcū Ō'acū mūsārē ne waro beseri curare nisetī'caronojōta a'tiro nicā quē'rārē nisetiroŋa'a. ¹⁸ Ō'acū ni'cūrē ō'rēcģu yapa

casero yejecō'ano'cure besebosami. Cūrē besecā, mejārōta yejecō'ano'cu niato. No'o yejecō'ano'ti'cure besecā quē'rārē, mejārōta yejecō'ano'ti'cu niato. ¹⁹ Yejecō'ano'cu, yejecō'ano'ti'cu nise wapamarī'i. Ō'acū dutisere weese pe'e wapatiyurūnū'cā'a. ²⁰ Nipe'tirā Ō'acū besenū'cācatero ní'caronojōta ninu'cūcā'rōna'a. ²¹ Ō'acū da'racō'terārē besebosami. Tojo besecā, mūsā da'racō'tesere wācūque'titicā'ña. Apetero mūsārē mūsā wiorā wijadutirāsama. Añu ni'i. Na tojo nicāta, wijabaque'oya. ²² Ō'acū marī wioḡu Jesucristore ējōpeodutigū mūsārē besecu niwī. Mūsārē besenū'cācaterore da'racō'terā ní'cārā niwū. Ní'cārōacāma a'tiro ni'i. Tojo da'racō'terā nimirā, Jesucristo yarā nitjīarā, da'racō'tesere wija'cārā weronojō ni'i. Cū ye cjasere da'ra'a. Āpērā quē'rā cū besenū'cārī curare da'racō'tetirā nicārā niwā. Ní'cārōacāma Jesucristore da'racō'terā weronojō nima. ²³ Ō'acū mūsārē ma'ígū, cū yarā niato níḡū Jesucristo wērīse me'rā wapayecu niwī. Tojo weerā masārē da'racō'terā weronojō niticā'ña. ²⁴ Ō'acū ne waro besenū'cācatero mūsā niseti'caronojōta niña tja. Cū yarā niña.

²⁵ Nūmo marīrā, marāpū marīrā pe'ema Jesucristo dutise marī'i. Tojo nimigū, no'o yū'u basu wācūse cā'rō mūsārē wereḡuti. Mūsā yū'ure ējōpeomasī'i. Marī wioḡu yū'ure pajaña'se bu'iri tojo weemasī'i. ²⁶ Yū'u a'tiro wācū'u. A'tiro nicā peje pi'etise ni'i. Tojo weerā nūmo marīrā ní'cārā nūmotiticā'ña. ²⁷ No'o nūmotigūpū ní'cu core cō'aticā'ña. No'o nūmo marīgū nūmotisī'rīgū a'maticā'ña. ²⁸ Mūsā nūmotirā, Ō'acūrē yū'rūnū'cārā mejēta wee'e. No'o nu'mio quē'rā marāpūtigo Ō'acūrē yū'rūnū'cāḡō mejēta weemo. Tojo nimirō, catiri ūmūcore peje pi'etise ni'i. Yū'u na tojo pi'etisere ūsātīmisa'a. Tojo weegū a'tere were'e.

²⁹ Acawererã, yu'u musãrẽ a'tiro nisĩ'rĩsa'a. A'tiro nicã peje pi'etise ni'i. Nemorõ ña'arõ wa'atjo cã'rõ du'sa'a. Ni'cãcã me'rã numotirã, numo marĩrã weronjõ tu'oña'ña. Musã numosãnumiarẽ wãcũnurũronojõ o'orã, Ô'acũ pe'ere wãcũnurũduti, tojo wa'a'a. ³⁰ Dujasewã'a utiri masã bujawetidojaticã'ña. No'o e'catirãnojõ e'catidojaticã'ña. Musã apeque duusere musã ye warore weronjõ tu'oña'ticã'ña. ³¹ A'ti umuco pe'tiwã'cãrõ wee'e. Tojo weerã a'ti turi cjasere uputu waro wãcũticã'ña.

³² Musãrẽ wãcũque'tiro marĩrõ nicã u'a. Numo marĩgũ marĩ wiogu cjasere pũrõ wãcũnurũsami. Jesucristo uasere weesi'rĩsami. ³³ Numotigu pe'e cũ numo añurõ nicã uagu, a'ti umuco cjasere wãcũnurũsami. Cũ numo e'caticã uasami. ³⁴ Cũ marĩ wiogu uase quẽ'rãrẽ weesi'rĩsami. Tojo weegu cũ weesi'rĩse puaro ducawaanu'cõsami. Numia quẽ'rãrẽ tojota ni'i. Marãpu marĩgõ marĩ wiogu ye cjasere pũrõ wãcũnurũsamo. Ô'acũ uaro dia'cũ weesi'rĩsamo. Co wãcũsepu quẽ'rãrẽ cũ uaro wãcũsamo. Marãputigo pe'e co marãpu añurõ nicã uasamo. A'ti umuco cjasere pũrõ wãcũnurũsamo. Co marãpu e'caticã weesi'rĩsamo.

³⁵ Yu'u musãrẽ añurõ wa'ato nĩgũ oja'a. Añurõ nidutigu, marĩ wiogu uaro dia'cũ weedutigu oja'a. Musãrẽ numotisere, marãputisere cã'mota'agu mejeta, tojo ni'i.

³⁶ Ni'cã cũ macõ mu'ñucã i'agũ, a'tiro nibosami: “Yu'u macõrẽ añurõ weetisa'a. Co marãputicã, añubosa'a”, nibosami. Tojo nigũnojõ numisoato. Te tojo weese ne ña'arõ weese niwe'e. ³⁷ Apĩ pe'e “Numisorouasato”, nitibosami. Cũ tojo weesi'rĩse cũrẽ añu nibosa'a. “Yu'u macõ marãputisome”, nibosami. Cũ tojo nicã, core añurõ wa'arosa'a. ³⁸ A'tiro ni'i. Macõrẽ marãputiduti'cu añurõ weegu weesami. Marãputidutitigu pe'e quẽ'rã totã añurõ weeyu'rũnu'cãsami. A'tiro ni'i. A'tocatero pi'etise peje

ni'i. Tojo weero marãputiticã, nemorõ añu ni'i.

³⁹ Marĩrẽ dutise a'tiro ni'i. Marãputigo co marãpu catiri cura cũ me'rã ninu'cũcã'to. Cũ wér'ica be'ro co no'lo tu'sagunojõ me'rã marãputiato, ni'i. Co marãpu Jesucristore ãjõpeogu niato. ⁴⁰ Yu'ũ pe'e a'tiro wãcũ'u. Co apaturi marãputitigo, nemorõ e'catibosamo. Yu'ũ quẽ'rã ãpẽrã mũsãrẽ bu'erã weronojõ Espĩritu Santure cu'o. Tojo weegu tojo ucũ'u.

8

Wa'icũ di'i na queose yee'quere ãjõpeorã ñubuepeo'quere ba'asama nise ni'i

¹ Mũsã sãrĩtiña'quere yũ'tiguti. “¿Wa'icũ di'i na queose yee'quere ãjõpeorã ñubuepeo'quere ba'arouati?” nise yũ'tiguti. Mũsã “Na ãjõpeose yee'quere wapamarĩ'i, tere masĩtoja'a”, nisa'a. Tojota ni'i, nĩrõ. Tojo nĩrã, a'tiro nĩrã weesa'a: “Ãpẽrã yũ'rũoro masĩyũ'rũnu'cã'a”, nima'acãrã weesa'a. Marĩ ãpẽrãrẽ ma'ĩrã, a'tiro pe'e weesa'a. Nemorõ narẽ Õ'acũrẽ ãjõpeocã weesa'a. ² No'lo “Masĩyũ'rũagu ni'i” nigũnojõ ne cã'rõ masĩtibutiacã'sami. “A'tiro wee masĩrõuasato”, nitisami. ³ Õ'acũ cãrẽ ma'igũ pe'ema a'tiro nisami: “Yagu nimi. Cãrẽ masĩ'i”, nisami.

⁴ Mũsã wa'icũ di'i ñubuepeo'quere ba'ase pe'e a'tiro ni'i. Mũsã nĩrõnojõta na ãjõpeose yee'que wapamarĩ'i. ãpẽrã Õ'acũ weronojõ nĩrãpu ne marĩma. Cũ ni'cũta nimi. ⁵ ãpẽrã cãrẽ ãjõpeotirã pãjãrã ãpẽrãnojõrẽ ãjõpeosama. U'muarõpu nĩrãrẽ, a'ti nucũcãpu nĩrãrẽ ãjõpeosama. Narẽ marĩ Õ'acũrẽ ãjõpeoro weronojõ tu'oña'sama. “Marĩ wiorã nima”, nisama. ⁶ Marĩ pe'e masĩno'lo, Õ'acũ marĩ pacũ ni'cũta nimi. Cũ nipe'tise a'ti turi cjasere bajurẽcu niwĩ. Marĩ cũ yarã cũ dutiro weejã ni'i. Tojo nicã Jesucristo quẽ'rã ni'cũta wiogu nimi. Cũ me'rã nipe'tise weeno'caro niwũ. Marĩ quẽ'rãrẽ

cũ yarã sãjãcã weecu niwĩ. Tojo weerã marĩ cũ me'rã ninu'cũcã'rãsa'a.

⁷ Æpërã Jesucristore ãjõpeorã, Õ'acũ ni'cũta nisere añurõ waro masiyu'rutêritisama. Na todapoporõpõre queose yee'quere ãjõpeose bu'iri tojo nisama. Tojo weerã ni'cãrõacãrẽ ñubuepeo'que di'ire ba'arã, a'tiro nisama: “Tere ba'arã, queose yee'quere ãjõpeorã wee'e”, nisama. Tojo weerã ãjõpeotuatirã ba'arã, bu'iritirã tu'oña'sama. Tojo tu'oña'mirã, tojo ba'acã'sama. Te me'rã na wãcũsere dojorêsama. ⁸ Marĩ ba'ase, marĩ ba'atise quẽ'rã marĩrẽ Õ'acũrẽ nemorõ ãjõpeocã weewe'e. Marĩ ba'arã, nemorõ añurã wa'asome. Ba'atirã quẽ'rã, ña'abutarã wa'asome. ⁹ Tojo nimicã, añurõ weeya musã. Apetero musã no'õ uaro ba'ama'arã, apĩ añurõ ãjõpeotutuatiẽgure dojorẽbosa'a. ¹⁰ A'tiro ni'i. Mu'u “Na ãjõpeose yee'que wapamarĩ'i” ni masĩmigũ, na ñubuepeo ba'awuarõpõ ba'agu wa'abosa'a. Apĩ ãjõpeotutuatiẽgũ pe'e mu'u tojo weesere i'abosami. Mu'u ba'acã i'agũ, “Queose yee'quere ãjõpeogũ weemi. Tojo weese ña'a ni'i”, ni wãcũbosami. Tojo wãcũmigũ, mu'urẽ i'acũugũ, cũ quẽ'rã ba'acã'bosami. Tere ba'agu, “Ña'arõ weegũ wee'e”, nibosami. Cũ tojo wãcũse bu'iri mu'u cũrẽ ña'arõ weegũ wee'e. Tojo weerã añurõ weeya. ¹¹ Mu'u masĩmigũ ba'agu, ãjõpeotutuatiẽgũ pe'ere dojorẽgũ wee'e. Cristo cũ quẽ'rãrẽ wẽrĩbosacu niwĩ. Mu'u ba'ase me'rã mu'u acaweregure dojorẽ'e. ¹² Mu'u ba'agu, Cristoreta ña'arõ weegũ wee'e. ¹³ Marĩ ba'ase me'rã marĩ acaweregũ ãjõpeotutuatiẽgure dojorẽbosa'a. Tojo weeri nĩrã, diacjũta ba'atiyu'rucã'rõua'a.

9

Jesucristo ye quetiwereri masãrẽ na bu'ese wapa wapata'aba'amasisama nise ni'i

¹ Yũ'ũ Jesucristo besecúú'cũ ni'i. Āpērã cũ besecúú'cãrã weronojõ weemasĩ'i. Yũ'ũ quẽ'rã marĩ wioꝝ Jesure ĩ'awũ. Tojo nicã mũsãrẽ marĩ wioꝝ quetire werewũ. Mũsã tere tũ'o ějõpeowũ. Tojo weerã yũ'ũ Jesucristo besecúú'cũ nisere masĩ'i. ² Āpērã yũ'ũre “Cũ Jesucristo besecúú'cũ mejẽta nimi”, nĩrã nisama. Mũsã pũrĩcã tojo niticã'ña. Yũ'ũ mũsãrẽ Jesucristore ějõpeocã weewũ. Tojo nicã mũsã cũrẽ ějõpeorãrẽ ni'cã curuata nerẽque'acã weewũ. Tojo weese me'rã yũ'ũ cũ besecúú'cũ nisere masĩ'i.

³ Āpērã yũ'ũre “Cũ Jesucristo besecúú'cũ nitimi” nicã, narẽ a'tiro yũ'tinu'cũ'u. ⁴ Yũ'ũ Jesucristo besecúú'cũ ni'i. Tojo weegũ yũ'ũ bu'ese wapa na ba'ase ecacã, sĩ'rĩse tĩacã, ñe'lemasĩ'i. ⁵ Apeye quẽ'rãrẽ yũ'ũ Āpērã Jesucristo besecúú'cãrã, tojo nicã cũ acabijirã weronojõ weemasĩ'i. Tojo nicã Pedro weronojõ weemasĩ'i. Ni'cõ numio Jesucristore ějõpeogore nũmoti, miamasĩ'i. ⁶ ¿De'ro wãcũti mũsã? Āpērã Jesucristo besecúú'cãrã cũ ye quetire wererã, da'ratima. ¿Ûsã dia'cũ Bernabé, yũ'ũ, Jesucristo ye quetire wererã ba'acatisĩ'rĩrã da'radu'umasĩtisarĩ? ⁷ Surara cũ ba'asere cũ basu wapayetisami. Cũ wiorã cũrẽ ecasama. Û'sere oteꝝ te dũcare ba'asami. Oveja co'tegũ quẽ'rã oveja õpẽcõ me'rã wee'quere ba'asami. ⁸⁻⁹ Yũ'ũre “Masã wãcũse dia'cũrẽ weremi”, niticã'ña. Õ'acũ ye queti ojãca pũrĩpũ Moisé Õ'acũ duti'quere a'tiro nicũ niwĩ: “Wecũ trigo ãrũagũ, tuumajãmisutuasami. Cũ ba'asĩ'rĩgũ, ba'ato. A'tiro weeticã'to. Trigore ba'ari nĩrã, ूसeropũ tuusãarĩ be'tore tuusãaticã'ña”, nicũ niwĩ. Õ'acũ tere nĩgũ, wecũ se'sarore wãcũticũ niwĩ. ¹⁰ Cũ tere nĩgũ, ãsã cũ ye quetire wererãrẽ queose o'osĩ'rĩgũ tojo nicũ niwĩ. A'tiro ni'i. Di'tare se'ecũumũ'tã'cũ, apĩ trigore ãrũagũ na ote'que dũcare na puarã dũcawaatjere wãcũyurã, da'rasama. ¹¹ Ûsã mũsãrẽ Jesucristo ye queti

wererã oteri masã weronojõ niwũ. Oteri masũ te otese ðacare miisami. Tojo weerã musã ãsarẽ apeyenojõ o'ocã, añu ni'i. ¹² Musã ãpêrãmarĩcãrẽ tojo o'osa'a. ãsã pũrĩcãrẽ tjãsa'a.

“Ësarẽ o'oya”, nímasĩ'i. Tojo nimirã, “O'oya”, ne niwe'e. Tojo nírónojõ o'orã, su'tinojõ, ba'asenojõ moorã, tojo nu'cãcã'wũ. A'tiro wãcũwũ: “Marĩ sêrĩcã pe'ere, Cristo ye quetire ðatibosama”, ni wãcũwũ. Tojo weerã apeyenojõ marĩcã ĩ'arã, tojo nu'cãcã'wũ. ¹³ ¿Musã masĩweti? Õ'acũ wi'ipũ da'rará masã Õ'acũrẽ ějõpeorã ba'ase miiti cũu'quere ba'asama. Na wa'icũrãrẽ wẽjẽ ĩjũamorõpeowũaropũ da'rará, te di'ire ba'asama. ¹⁴ A'te weronojõ Jesucristo ye queti wererã quẽrãrẽ “Na te da'rãse me'rã wapata'aba'ato”, nicũ niwĩ marĩ wiogũ. ¹⁵ Tojo nimicã, yũ'ũ ne ni'cãti a'tere niticãti. Tojo nicã ni'cãrõcã quẽrãrẽ musãrẽ apeyenojõ o'odutigũ mejẽta tojo oja'a. Ĥjaboa wẽrĩmigũ, musãrẽ were'que wapa wapaseesome.

¹⁶ Yũ'ũ Jesucristo ye quetire weregũ, tere werese bu'iri “Ãpêrã yũ'rũoro añuyũ'rũnu'cã'a”, niwe'e. Te yũ'ũ da'rãse ni'i. Yũ'ũ tere wereticã, ña'arõ wa'abosa'a. ¹⁷ Tojo weegũ yũ'ũ ñaro me'rã weregũ, wapata'abopã. Yũ'ũre weredutisere weegũ, Õ'acũ cũu'quere weegũ wee'e. Cũ yũ'ũre wapayegũsami. ¹⁸ Yũ'ũ Jesucristo ye quetire weregũ, wapata'aba'amasĩ'i. Tojo weeta basiomicã, “Wapayeya”, niwe'e. Yũ'ũ wapata'ase a'tiro ni'i. Jesucristo masãrẽ yũ'rũomi nise quetire weregũ, e'cati'i. Tere weregũ, wapaseewe'e. Tereta yũ'ũ wapata'a.

¹⁹ Masãrẽ yũ'ũ bu'esere tũ'oato nígũ a'tiro wee'e. Ne ni'cũrẽ da'rawã'ñaco'tegũ nitimigũ, nipe'tirãrẽ da'rawã'ñaco'tegũ weronojõ tũ'oña'a. Pãjãrã Cristo yarã sãjãcã ñasãgũ, tojo wee'e. ²⁰ Judío masã tiropũ nígũ, na Jesure ějõpeocã ñasãgũ na weronojõta niseti'i. A'tiro ni'i.

Judío masã Moisé dutise doca nima. Õ'acũ yu'ure te dutise doca nidutitimi, nígũpua. Mejõ na Jesucristore ãjõpeocã uasãgũ yu'u quẽ'rã na weronojõ Moisé dutise doca weronojõ ni'i. ²¹Judío masã nitirã quẽ'rãrẽ Moisé dutisere masĩtirã, na Jesucristore ãjõpeocã uasãgũ na weronojõ niseti'i. Tojo nisetimigũ, “Õ'acũ dutisere weetigũ ni'i”, niwe'e. Cristore ãjõpeotjĩagũ, Õ'acũ dutisereta wee'e.

²² Yu'u ãjõpeotutuaturã me'rã nígũ, na Jesucristore ãjõpeocã uasãgũ na weronojõta wee'e. “Masĩpe'ocã'a”, niwe'e. Tojo weegu nipe'tirãrẽ “¿Yu'u de'ro weecã na yu'rũsĩ'rĩmitina?” nígũ, na weewuasenojõrẽta weeseti'i. ²³Jesucristo ye quetire weregũ, na tu'oato nígũ tojo wee'e. Cũ ye queti añuse ni'i. Yu'u nipe'tirã tere masĩcã ua'a. Jesucristo narẽ yu'rũose yu'u wapata'ase ni'i.

²⁴ A'tere queose me'rã were'e. Omawapata'ari masã nipe'tirã omasama. Nipe'tirã omamirã, ni'cũta wapata'asami. Mũsã tere masĩ'i. Mũsã quẽ'rã nipe'tirã wapata'asĩ'rĩrã, wapata'ari masũ weronojõ omaña. Mũsãrẽ Õ'acũ o'ootjere wapata'asĩ'rĩrã, cũ uaro weeya. ²⁵ Nipe'tirã na omati dũporo añurõ omabu'esama. Tojo weerã na queoro ba'asama. Na upure dojorẽsere weetisama. Na pũrĩ me'rã wéeca be'tore wapata'asĩ'rĩrã, tojo weeyusama. Ti be'to maata boadija wa'asa'a. Marĩ quẽ'rã Õ'acũ uatisere, ña'asere du'urã, Õ'acũ yere wee'e. Cũ o'ootje wapata'asĩ'rĩrã, tojo wee'e. Cũ o'ose ne pe'tisome. ²⁶ Tojo weegu yu'u omarĩ masũ weronojõ queoro wee'e. Wãcũtimigũ, tojo weema'awe'e. Yu'u weeatjere wãcũyu'u. ²⁷ Yu'u uaro dia'cũ weewe'e. Ña'arõ ñaripejasere weewe'e. Wãcũtutua'a. Tojo weeticãma, Jesucristo ye quetire ãpẽrãrẽ werecã, Õ'acũ yu'ure “Añurõ weewu”, nitibosami. Añuse yu'ure o'obo'quere o'otibosami.

10

Duþporocjārã weronojõ weeticã'ña nise ni'i

¹ Jesucristore ãjõpeorã, musãrẽ a'tere musã masicã uasa'a. Ô'acũ ãsã Israe curuacjārã ñecũsumma me'rã nicu niwĩ. Cũ o'óca curua o'mecurua me'rã na duþoro u'mutãcu niwĩ. Nipe'tirã cãrẽ siruturã, pajiri maa aco s'õ'arĩ maajo decopu pẽ'acãrã niwã. ² Na o'mecuruare sirutu'cãrã ti maarẽ pẽ'a'cãrã nipe'tirã wãmeyeno'cãrã weronojõ tojacãrã niwã. Te me'rã na Moisé yarã sãjãcãrã niwã. ³ Na nipe'tirã Ô'acũ o'o'que u'muse cjase manã wãmetisere ba'acãrã niwã. ⁴ Nipe'tirã aco Ô'acũ o'o'quere ãtãgãpu ní'quere s'ĩ'ricãrã niwã. Cristo ãtãgã aco wijaacaga weronojõ nimi. Cũ na nipe'tirãrẽ co'tegũ, nipe'tiropu ba'patiwa'cãcu niwĩ. ⁵ Narẽ tojo weemigũ, Ô'acũ pãjãrãrẽ tu'saticu niwĩ. Cãrẽ yu'runu'cãcã ã'agũ, tojo weecu niwĩ. Te ye bu'iri na yucu marĩrõpu wa'arã, pãjãrã boabajaque'aticãrã niwã.

⁶ Narẽ tojo wa'a'que marĩrẽ queose weronojõ ni'i. Marĩrẽ na ña'arõ wee'caro weronojõ weedutitiro tojo wa'acaro niwũ. ⁷ Tojo weerã ãpẽrã na yee'quere ãjõpeoticã'ña. Toduþporocjārã weronojõ weeticã'ña. Ô'acũ ye queti ojãca pũrĩpu wecu queosere ãjõpeorã da're'quere a'tiro o'jano'wũ: "Masã ba'a, s'ĩ'ricãrã niwã. Tu'ajanu'cõ, na no'o uaro bosenumu nu'cãcãrã niwã." ⁸ Marĩ na weronojõ no'o uaro a'metãrãbajaque'aticã'rã. Námaricã tojo wee'que wapa ni'cã numu veintitrés mil wẽricãrã niwã. ⁹ Na marĩ wioꝑu Ô'acũrẽ ña'arõ ucũcãrã niwã. Ô'acũ marĩrẽ co'tetimi ní'ã, cãrẽ uacã weecãrã niwã. Marĩ na wee'caronojõ weeticã'rã majã. Námaricã tere wéerã, pãjãrã aña cũ'rĩwẽjẽno'cãrã niwã. ¹⁰ Tojo nicã musã Ô'acũ me'rã na wee'caronojõ tu'satirã, niticã'ña. Na tojo weecã ã'agũ, Ô'acũrẽ wereco'tegũ u'musecũ narẽ wẽjẽcõ'acu niwĩ.

¹¹ Õ'acũ marĩrẽ masĩdutigu narẽ tojo weecu niwĩ. Marĩ a'tocaterocjãrãrẽ a'ti umũco ðajawã'cãrõ wee'e. Õ'acũ ðaporocjãrãrẽ bu'iri da'recu niwĩ. Te bu'iri da're'quere cũ ye queti ojãca pũrĩpũ ojaduticu niwĩ. Marĩrẽ na weronojõ ña'arõ weedutitigu tojo weecu niwĩ. ¹² No'lo “Yũ'ũ pũrĩcã añurõ ãjõpeo'lo, ña'arõ weesome” nigũnojõ tu'omasĩña. Apetero weegu mũ'ũ ña'arõ weebosa'a. ¹³ Apetero marĩ basu ña'arõ weesĩ'rĩsa'a. O apetero wãtĩ marĩrẽ ña'arõ weedutisami. Marĩ dia'cũ mejẽtare tojo wa'a'a. Nipe'tirãrẽ tojo wa'asa'a. Õ'acũ pe'e cũ “Weeguti” ni'quere weeticã weetisami. Cũ marĩ ña'arõ weesĩ'rĩcã, nu'cãto nígũ marĩrẽ weetamusami. Tojo weerã marĩ ña'arõ weebo'quere weewe'e.

¹⁴ Tojo weerã Jesucristore ãjõpeorã yũ'ũ mairã, mũsã na yee'cãrãrẽ ñubuepeoropũ ne wa'aticã'ña. Tere ne cã'rõ ãjõpeoticã'ña. ¹⁵ Mũsãrẽ masãrẽ weronojõ ucũ'u. Mũsã basu yũ'ũ ucũsere tu'oña'ña. ¹⁶ Marĩ põtẽrĩrã, sĩ'rĩrĩ pa sĩ'rĩse ðuporo Õ'acũrẽ e'catise o'lo'o. Ti pare sĩ'rĩrã, Jesucristore bu'ipejatamu'u. Cũ marĩrẽ wẽrĩbosagu, cũ dí o'maburocu niwĩ. Tojo nicã pãgãrẽ ðucawaa ba'arã, ni'cã curua, ni'cã upũ wa'a'a. Tere ba'arã, Cristo curusapũ wẽrĩ'quere bu'ipejatamu'u. ¹⁷ Marĩ pãjãrã nimirã, ni'cãgã cjase pãrẽ ba'a'a. Tojo weerã marĩ ni'cã curua, ni'cã upũ weronojõ ni'i.

¹⁸ Israe curuacjãrãrẽ wãcũña. Na Õ'acũrẽ ãjõpeorã, wa'icũrãrẽ ãjũamorõpeosama. Te di'ire ba'asama. Tere ba'arã, na Õ'acũrẽ bu'ipejatamusama. ¹⁹ Mũsãrẽ a'tiro nigũti. Yũ'ũ masã na yee'que pe'ema “Wapatil'i”, nigũ mejẽta wee'e. Wa'icu di'i na yee'cãrãrẽ wẽjẽ ñubuepeo'que quẽ'rãrẽ a'tiro nigũti: “Apeye di'i weronojõ ni'i”, nigũ mejẽta wee'e.

²⁰ Tojo nitimigũ, a'tiro ni'i. Õ'acũrẽ ãjõpeotirã na yee'cãrãrẽ wa'icũrã wẽjẽ ñubuepeorã, wãtĩarẽ ãjõpeorã

weema. Õ'acũ mejẽtare ẽjõpeoma. Na tojo weecã, musã na me'rã nerẽ ba'arã, wãtĩa me'rã bu'ipejatamurã wee'e. Musã tojo weecã ɥawe'e. ²¹ Marĩ põtẽrĩrã, marĩ wiogũ ya pare sĩ'rĩ'i. Cũrẽ bu'ipejatamurã, cũ yere ba'a'a. Na yee'quere ñubuepeowɥaropɥ cjase pe'e na o'ose te sĩ'rĩse, te ba'ase wãtĩa ye ni'i. Tojo weerã musã marĩ wiogũre bu'ipejatamurã, cũ yere ba'arã, wãtĩa ye pe'ere ba'ata basiowe'e. Wãtĩa yere ba'arã, narẽ bu'ipejatamubosa'a. ²² Marĩ, wãtĩarẽ bu'ipejatamurã, marĩ wiogũ Õ'acũrẽ doecã weebosa'a. Cũ marĩ me'rã uacã, marĩ põtẽotisa'a. Cũ tutuagũ nimi.

Marĩ ɥaro dia'cũ wéerã, ãpẽrãrẽ ma'itibosa'a nise ni'i

²³ Masã a'tiro ucũwɥasama: “Marĩ weesi'rĩsere no'o ɥaro weemasĩ'i.” Tojota ni'i, nĩrõ. Apeye marĩ weesi'rĩse marĩrẽ weetamutisa'a. Marĩ ɥaro wéerã, ãpẽrãrẽ Õ'acũrẽ nemorõ ẽjõpeocã weetibosa'a. ²⁴ ãpẽrãrẽ añurõ wa'acã ɥasãrõɥa'a. Marĩ ye dia'cũrẽ wãcũnũrũticã'l'rõɥa'a.

²⁵⁻²⁶ Õ'acũ ye queti ojãca pũrĩpɥ a'tiro ojano'wũ: “Nipe'tise a'ti turipɥ nise marĩ wiogũ ye ni'i”, ni ojano'wũ. Nipe'tise ba'ase Õ'acũ wee'que ni'i. Tojo niyucã, nipe'tisere ba'amasĩ'i. Tojo weerã ba'ase duawɥaropɥ duasere no'o ɥaro duuba'aya. Musã bu'iritirã tũ'oña'rĩ nĩrã, “¿Na queose yee'cãrãrẽ ñubuepeo'que di'i niti?” ni sẽrĩtĩña'ticã'ña.

²⁷ Apetero weegũ ni'cũ Jesucristore ẽjõpeotigũ musãrẽ cũ tiropɥ ba'adutibosami. Musã cũ tiropɥ wa'asĩ'rĩrã, nipe'tise cũ ecasere ba'aya. Musã bu'iritirã tũ'oña'rĩ nĩrã, “¿A'te de'ro wee'que di'i niti?” ni sẽrĩtĩña'ticã'ña.

²⁸ Topɥ nĩrĩ cura ni'cũ Jesucristore ẽjõpeogũ musãrẽ a'tiro nibosami: “A'te queose yee'cãrãrẽ na ñubuepeo'que di'i ni'i”, nibosami. Cũ tojo nicã, te di'ire ba'aticã'ña. Cũ musã ba'acãma, mejẽcã wãcũbosami. Tojo wãcũticã'to nĩrã tojo weeya. ²⁹ Tojo nĩgũ, cũ wãcũsere ucũgũ

wee'e. Mũsã wãcũse mejẽtare ucũ'u. Marĩ a'tiro nibosa'a: "Apĩ ña'arõ tu'oña'se bu'iri ¿de'ro weeacũ yũ'u weesĩ'rĩsere dũcayubosau? ³⁰ Yũ'u ba'asere Õ'acũrẽ e'catise o'ocã, ãpẽrã yũ'u ba'asere mejẽcã nímasĩtisama", nibosa'a. ³¹ A'tiro ni'i. Marĩ ba'ase, sĩ'rĩse me'rã añurõ weecãma, añu ni'i, añurõ. Mejõ a'tiro ña'a. Nipe'tise marĩ ãpẽrãrẽ ãjõpeocã weecã, añu nisa'a. Tojo weecã, nipe'tirã Õ'acũrẽ e'catipeorãsama. ³² Mũsã weese me'rã nipe'tirã Õ'acũ yarãrẽ, judío masãrẽ, judío masã nitirãrẽ ña'arõ weecã weeticã'ña. ³³ Yũ'u weronjõ weeya. Nipe'tise yũ'u weese me'rã Õ'acũ yarãrẽ añurõ weesĩ'rĩ'i. Nipe'tirã Jesucristore ãjõpeocã ñasãgũ na tu'sasere weenu'cũsĩ'rĩ'i. Yé pe'ere añurõ weesĩ'rĩwe'e. ãpẽrã ye pe'ere na yũ'rũcã ñasãgũ wãcũnrũ'u.

11

¹ Mũsã quẽ'rã yũ'u weronjõ weeya. Cristore yũ'u siruturonjõta yũ'ure sirutuya.

Numia na ñubuew ñaropũ weewũase ni'i

² Yũ'ure mũsã wãcũcã, yũ'u bu'e'quere queoro weecã tu'ogu, e'cati'i. ³ Apeyenojõ mũsãrẽ masĩcã ña'a. Cristo ñũũanũcũrẽ na dũpoá nimi. Ëmũ pe'e numio dũpoá nimi. Õ'acũ quẽ'rã Cristo dũpoá nimi. ⁴ Ëmũ Õ'acũ wi'ipũ ñubuegu, cã dũpoapũ su'ti caserore pesatisami. Tojo nicã Õ'acũ wereduti'quere wereturiagu, pesatisami. Pesagu pũrĩcã, bopoyoro weegu weebosami. Cã tojo wéegu, marĩ wiogu Jesucristore wiopesase me'rã ãjõpeotibosami. ⁵ Numio pũrĩcã ñubuego, dũpoapũ su'ti caserore pesasamo. Tojo nicã Õ'acũ wereduti'quere wereturiago, mejãrõta weesamo. Co pesatigo, bopoyoro weego weebosamo. Ëmũ weronjõ weebosamo. Co marãpure, co wiogũre yũ'rũnũ'cãgõ weesamo. Poarire seecõ'a

wɔjaweenoc'o weronojō nibosamo. ⁶ Co pesaticā, diacjūta co poarire seecō'a wɔjaweepe'ocā'rōna'a. Tojo weesī'rītigo, bopoyo ni'i nígō, pesato. ⁷ Ɔmɔ pe'e pesaticā'rōna'a. Cū Ō'acū weronojō wioɔɔ nimi. Ɔmɔ Ō'acū wioɔɔ nimi nisere ī'omi. Numio pe'e ɔmɔ wioɔɔ nimi nisere ī'omo. Tojo weego co su'ti caserore pesarona'a. ⁸ Ne waropɔ Ō'acū ɔmɔrē wééɔ, numio ya ō'a me'rā weeticɔ niwī. Numio pe'ere ɔmɔ ya ō'a me'rā weecu niwī. ⁹ Ō'acū numiorē ɔmɔrē weetamudutigu weecu niwī. Ɔmɔ pe'ema numiorē weetamuacɔ mejētare weecu niwī. ¹⁰ Tojo weerā numia mɔsā nerēwɔaropɔre nírā, su'ti caserore pesarona'a. Tojo weego co ɔmɔa dutise doca nisere ī'osamo. Apeye quē'rārē Ō'acūrē wereco'terā ɔ'mɔsepɔ nirá co tojo weesere ī'asama. ¹¹ Tojo nimicā, marī Jesucristore ējōpeorā a'merī weetamu'u. Ɔmɔa numia weetamuse marīrō nímasītisama. Numia quē'rā ɔmɔa weetamuse marīrō nímasītisama. ¹² Diacjūta ni'i. Ō'acū numiorē ɔmɔ ya ō'a me'rā weecu niwī. A'te quē'rā diacjū ni'i. Ɔmɔa numiapɔre bajuasama. Nipe'tirā Ō'acū weeno'cārā dia'cū nima. Cū narē de'ro wee nisetiatjere weecu niwī.

¹³ ¿Mɔsā de'ro wācūti? Numia na Ō'acū wi'ipɔ Ō'acūrē sērīrā, dɔpoapɔ su'ti casero pesaticā ¿añuti? Añuwe'e. ¹⁴ Nipe'tirā masīno'o. Ɔmɔ poanɔ'mo yoacā, bopoyo ni'i. ¹⁵ Numia pe'e co poanɔ'mo yoacā, añuyɔ'rna'a. Masīno'o. Co dɔpoare ma'masu'ago poanɔ'morē o'masamo. Su'ti casero pesago weronojō weesamo. ¹⁶ Yɔ'ɔ ucūsere “Tojo niwe'e” nigūnojōrē a'tiro nigūti. “Ūsā, tojo nicā āpērā Jesucristore ējōpeorā apeye weesetisenojōpɔma masīnemoña marī'i”, nigūti.

*Miinerē*ba'arā queoro weeti'que ni'i

¹⁷ Ni'cārōacā mɔsārē apeye oja'a. Tere ojagɔ, “Añurō weerā wee'e”, nigū mejēta wee'e. Mɔsā nerērā, añurō

weeboronojō o'orā, mejō pe'e dojorēaporo. ¹⁸ Mūsārē a'tiro nimu'tāgūti. Mūsā nerēwuarā, ducawatisa'a. Mūsā tojo weese quetire tu'owu. Yu'u tu'oña'cā, a'te queti diacjūta nisa'a. ¹⁹ Mūsā a'tiro ni wācūsa'a: “Marī ducawatiwजारुा'a. Te me'rā ĵnoa pe'e Jesucristo yarā waro nitito? nisere i'orāsa'a”, nisa'a.

²⁰ Mūsā ducawatise ye bu'iri miinerēba'arā, marī wiogu cū bu'erā me'rā ba'atuo'caro weronojō queoro etiba'atīsa'a. ²¹ Mūsā ba'ase miasere no'o űaro ba'anu'cāsa'a. Pajiro ba'a, sī'rī, que'asa'a. Āpērā pe'e ba'atirā űjaboasama. ²² ĵMūsā wi'seri mooti? Te wi'seripu ba'a, sī'rībosa'a. No'o űaro wéerā, mūsā nerēwuasere wapamarī'i, nirā wee'e. Ba'ase moorārē bopoyoro yu'rūcā weerā wee'e. ĵDe'ro nibosau mūsārē? A'tere mūsārē “Añurō weerā wee'e”, niwe'e.

Jesucristo cū bu'erārē su'ori ba'atuo'que ni'i
(Mt 26.26-29; Mr 14.22-25; Lc 22.14-20)

²³ Yu'u mūsārē bu'e'quere marī wiogu yu'ure bu'ewī. A'tiro ni'i. Jesú cūrē i'atu'tirāpūre o'otji ñamita Jesú pāre mii, ²⁴ Ō'acūrē e'catise o'ocū niwī. Tu'ajanu'cō, tigare cū bu'erārē ducawaacu niwī. Be'ro narē nicū niwī: “A'te yu'u upu ni'i. Yu'u mūsā ye niatjere wērībosaguti. A'tiro yu'u ni'cārōacā wee'caronojō weenu'cūcā'ña. Tere wéerā, yu'u mūsārē wērībosasere wācūña”, nicū niwī. ²⁵ Na ba'āca be'ro sī'rīrī pare mii, narē nicū niwī: “Mūsā ye niatjere yu'u wērīgūti. Yu'u wērīcā, yé dí o'maburorosa'a. Ō'acū dūporopu mūsā me'rā 'A'tiro apoguti', nicū niwī. Cū ni'caronojōta yé dí me'rā mūsā me'rā apogusami. Mūsā nipe'tisetiri ti pare sī'rīsetirinucū yu'ure wācūña”, nicū niwī. ²⁶ A'tiro ni'i. Mūsā pāre ba'arā, ti pare sī'rīrā, marī wiogu cū marīrē wērībosa'quere i'onu'cūrā wee'e. Téé cū apaturi a'ticāpu mūsā tojo weenu'cūcā'rāsa'a.

Põtērīse dūporo marī weesetisere wācūmū'tādutise ni'i

²⁷ Marī wioḡu Jesucristo põtērīdutisere wiopesase marīrō pářē ba'ama'agūnojō, ti pare sī'rīma'agūnojō bu'iri cūomi. Cū wērīsere, cū ye díre mejō nise weronojō tū'oña'sami. ²⁸⁻²⁹ A'tiro ni'i. Marī Jesucristore ējōpeorā nerēwuarā, ni'cā curua, ni'cā upu ni'i. Marī wioḡu ya upu ni'i. Marī tere queoro wācūtimirā, pářē ba'a, ti pare sī'rīcā, Ō'acū bu'iri da'resami. Tojo weerā nipe'tirā marī põtērīati dūporo marī weesere ĵña'arō weecāti? nīrā, wācūmū'tārōña'a. Tojo wéeca be'ropu pářē ba'a, ti pare sī'rīmasī'i. ³⁰ Mūsā tojo weetise ye bu'iri pājārā dutiti, tu-tuatima. Ni'cārērā wērīatojama. ³¹ Marī põtērīse dūporo wācūmū'tācāma, Ō'acū tojo bu'iri da'retibosami. ³² Marī wioḡu añurō weeato níḡū marīrē bu'iri da'rewelosami. Cū marīrē, āpērā cūrē ējōpeotirā me'rā pecame'epu wa'acā uatimi. Tojo weegū ña'arō weesere du'udutigū marīrē bu'iri da'rewelomi.

³³ Tojo weerā, acawererā, miinerēba'arā, a'tiro weeya. Ni'cārō me'rā ba'arātirā, yucueya. ³⁴ No'o ujaboagūnojō cū ya wi'ipū ba'ato. Tojo weecā, Ō'acū mūsā añurō nerēcā ī'agū, bu'iri da'resome. Apeyema mūsā tiropu wa'agu, apogūti.

12

*Masān*ucū weemasīsere Espírītu Santu o'ose ni'i

¹ Acawererā, Espírītu Santu mūsārē Ō'acū yere weemasīatjere o'omí. Mūsārē tere queoro masīcā ũa'a.

² Mūsā masī'i, Jesucristore ējōpeose dūporo masā yee'quere no'o ũaro ējōpeosirutucārā niwū. Na yee'que catise mejēta nicaro niwū. Ucūticaro niwū. ³ Mūsā masīticārā niwū. Te bu'iri a'tiro masīcā ũa'a. Ne ni'cū Espírītu Santure cūḡu Jesure a'tiro nímasītisami: “Pecame'epu

wa'abata'to", nímásītisami. Tojo ucūgũ pūrīcã Espírítu Santu o'ose me'rã mejêta ucūsami. Apí "Jesú marĩ wioꝝ nimi" nígũ, cũ pūrīcã Espírítu Santure cꝝomi. Espírítu Santu moogũ tojo nímásītibosami.

⁴ Marĩrẽ Espírítu Santu cũ weemasĩse o'osere mejêcã dia'cũ dꝛcawaasami. Tere Espírítu Santu ni'cũta o'omi. ⁵ Cũ o'ose me'rã marĩ wioꝝ Jesucristo marĩrẽ mejêcã dia'cũ da'radutisami. Tojo da'radutimigũ, Jesucristo ni'cũta nimi. ⁶ Cũ dutisere weérã, mejêcãrĩ dia'cũ weesa'a. Ô'acũ ni'cũta nipe'tirã marĩ weesere añurõ wa'acã weesami. ⁷ Espírítu Santu cũ o'ose me'rã marĩnꝛcãrẽ cũ marĩ me'rã nisere ĩ'osami. Cũ o'ose me'rã marĩ nipe'tirã Jesucristore ĩjõpeori curuacjãrãrẽ a'merĩ añurõ weemasĩ'i. ⁸ A'tiro ni'i. Āpẽrãrẽ cũ masĩse o'ose me'rã ucũme'rĩcã weesami. Āpẽrãrẽ mejãrõta cũ me'rã Ô'acũ ye queti ojãca pũrĩꝝ oja'quere tũ'omasĩ, wereme'rĩcã weesami. ⁹ Āpẽrãrẽ cũta tja ĩjõpeoꝝrũnũ'cãsere o'osami. Tojo nicã ãpẽrã dutitirãrẽ yũ'rũomasĩsere o'osami. ¹⁰ Āpẽrã cũ tutuaro me'rã añuse wee'omasĩsama. Āpẽrãrẽ Ô'acũ were'quere wereturiamasĩsere o'osami. Āpẽrãrẽ "¿Noa wãtĩ me'rã nisoo ucũti? ¿Noa Espírítu Santu me'rã dia'cũ ucũti?" ni besemasĩsere o'osami. Espírítu Santu ãpẽrãrẽ apemasã yere masĩtimirã ucũcã weesami. Āpẽrã na ucũcã masĩtimirã, wereturiamasĩsama. ¹¹ Espírítu Santu cũ uaro cũ o'osĩrĩsere marĩnꝛcãrẽ dꝛcawaasami. Marĩrẽ mejêcãrĩ dia'cũ weesetiatjere dꝛcawaasami. Cũ ni'cũ nimigũ, tojo weesami.

Marĩ pãjãrã nimirã, ni'cã curua, ni'cã upũta ni'i nise ni'i

¹² Marĩ upũ ni'cã upũ nimirõ, peje dꝛcawatĩ'i. Tojo dꝛcawatimirõ, ni'cã upũta ni'i. Cristo que'rã tojota nimi. Pãjãrã cãrẽ ĩjõpeoma. Na pãjãrã nimirã, cũ upũ weronojõ ni'cã curua cũ me'rã nima. ¹³ A'tiro ni'i. Marĩ

cãrẽ ãjõpeorã nipe'tirã judío masã, judío masã nitirã, ãpẽrãrẽ da'rawã'ñaco'teri masã, da'rawã'ñaco'tetirã Espiritu Santu ni'cũ me'rãta wãmeyeno'wũ. Tojo weerã ni'cã upũ ni'i. Marĩ nipe'tirãputa Espiritu Santureta cõo'o.

¹⁴ Ni'cã upũ peje ducawatise cõocã'a. ¹⁵ Marĩ dũ'pocã ucũri dũ'pocã nĩrõ, a'tiro nibosa'a: “Omocã niwe'e. Tojo weegũ marĩ upũ cjase niwe'e.” Tojo nise ye bu'iri dũ'pocã upũpũ niticã weewe'e. Topũta wã'ña'a. ¹⁶ Marĩ o'mepero a'tiro ucũbosa'a: “Capea niwe'e. Tojo weegũ marĩ upũ cjase niwe'e.” Tojo nise ye bu'iri o'mepero upũpũ niticã weewe'e. Topũta wã'ña'a. ¹⁷ Marĩ upũ capeajo dia'cũ nicã, ¿de'ro wee marĩ tũ'obosau? Marĩ upũ o'meperojo dia'cũ nicã, ¿de'ro wee marĩ wĩjĩña'bosau? ¹⁸ Õ'acũ marĩ upũre wee'cũ pe'ema cũ ãaro me'rã nipe'tisere queoro cũucũ niwĩ. ¹⁹⁻²⁰ Ni'cã upũ peje ducawatise cõo'o. Tojo nimirõ, ni'cã upũta ni'i. Peje ducawatise móórõ, ni'cã upũ niwe'e. Marĩ Jesucristore ãjõpeorã ni'cã upũta ni'i.

²¹ Capea omocãrẽ “Mũ'urẽ ãatisa'a”, nĩmasĩtisa'a. Dũpoa quẽ'rã dũ'pocãrĩrẽ “Ëatisa'a”, nĩmasĩtisa'a. ²² A'tiro pe'e ni'i. Marĩ upũ cjase nipe'tisere ãa'a. Marĩ upũpũre apeye mejõ nise ni'i. Tojo nimicã, te marĩcã, catimasĩtisa'a. ²³ Marĩ apeye upũ cjasere mejõ nise tũ'oña'a. Tojo weerã tere añurõ bajuato nĩrã añurõ apo'o. Apeye quẽ'rãrẽ masã ã'aticã'to ni, bopoyasãrã, su'ti sãñacã'mota'a'a. ²⁴ Apeye nemorõ añurõ bajuse me'rã pe'ema tojo weewe'e. Õ'acũ marĩ upũ cjasere añurõ apocũ niwĩ. Ni'cã upũta añurĩ upũ niato nĩgũ tojo weecũ niwĩ. Marĩ mejõ nise tũ'oña'senojõrẽ añurõ wãcũcã weecũ niwĩ. Te weronojõ marĩ mejõ nigũ tũ'oña'gũrẽ marĩrẽ añurõ wãcũcã weemi. ²⁵ Cũ tojo wéégũ, nipe'tise marĩ upũ cjasere ni'cãrõnojõ a'merĩ weetamudutigũ tojo cũucũ niwĩ. ²⁶ Marĩ upũpũre ni'cãrõ pũrĩno'cã, nipe'tiropũ se'sa

wa'a'a. No'o ni'cārō añurō wa'acā, nipe'tiropu añurō tū'oña'a.

²⁷ Tojo nígũ, a'tiro nigũ wee'e. Marĩ Cristore ějõpeorã cũ ya upu weronojõ ni'i. Marĩnucũ cũ ya upucjãrã ni'i.

²⁸ Õ'acũ marĩ upu cjasere ducawaacu niwĩ. Cũ tojo wee'caronojõ Jesucristore ějõpeori curuacjãrãrẽ a'merĩ weet-amuatjere cũucu niwĩ. Ne waro Jesucristo besecúú'cãrãrẽ nipe'tirã bu'ipu besecúúucu niwĩ. Na be'rocjãrã Õ'acũ wereduti'quere wereturiari masãrẽ cũucu niwĩ. Na be'rore Õ'acũ ye quetire bu'eri masãrẽ cũucu niwĩ. Be'ro añuse, mejẽcã bajusere wee'orĩ masãrẽ cũucu niwĩ. Na be'rore dutitirãrẽ yu'ruori masãrẽ, weetamurĩ masãrẽ, tojo nicã dutiri masãrẽ cũucu niwĩ. Nipe'tirã be'ro apemasã yere masĩtimirã ucũrĩ masãrẽ cũucu niwĩ.

²⁹ Masĩno'o. Marĩ nipe'tirãrẽ mejãrõta weedutigũ cũuticu niwĩ. Marĩ nipe'tirã Jesucristo besecúú'cãrã niwe'e. Nipe'tirã Õ'acũ yere wereturiari masã niwe'e. Nipe'tirã Õ'acũ ye quetire bu'eri masã niwe'e. Nipe'tirã añuse mejẽcã bajusere wee'omasĩwe'e. ³⁰ Nipe'tirã dutitirãrẽ yu'ruomasĩwe'e. Nipe'tirã apemasã ye ucũsere ucũwe'e. Nipe'tirã na tojo ucũcã tũ'otimirã, wereturiamasĩwe'e. ³¹ Mũsãrẽ Espĩritu Santu cũ weemasĩsere o'ocãma, añuyu'ruasere beseyu'runu'cãña. Yu'u mũsãrẽ a'te nipe'tise nemorõ añuyu'runu'cãsere wereguti.

13

Ma'ise apeyenojõ yu'ruoro añuyu'runu'cã'a nise ni'i

¹ Marĩ apemasã ye ucũsere masĩtimirã, ucũmasĩbosa'a. Õ'acũrẽ wereco'terã u'mũsecjãrã ye quẽ'rãrẽ ucũmasĩbosa'a. Tojo weemasĩmirã ãpẽrãrẽ ma'itirã, to'atu o cõmepjĩrẽ no'o uaro paama'arã weronojõ nibosa'a.

² Apeyere Õ'acũ marĩrẽ were'quere añurõ wereturiamasĩ-bosa'a. Tojo weemirã ãpẽrãrẽ ma'itirã, tu'omasĩtirã weronojõ nibosa'a. Tojo nicã nipe'tise masã masĩña marĩ-quere masĩbosa'a. No'o nipe'tisere masĩpe'ocã'bosa'a. Tojo masĩmirã ãpẽrãrẽ ma'itirã, tu'omasĩtirã weronojõ nibosa'a. Marĩ ãjõpeoyu'runu'cãrã pũricã, ãrũgũrẽ ap-eropyu wa'adutimasĩbosa'a. Tojo weeta basiomica a'merĩ ma'ise móorã, mejõ waro ucũma'acã'bosa'a. ³ Marĩ cuose nipe'tisere pajasecuorãrẽ o'obosa'a. Marĩ narẽ ma'itimirã o'orã, tojo o'oma'acãrã weesa'a. Marĩ Õ'acũ yere weecã, cũrẽ ãjõpeotirã marĩrẽ ãjũadutibosama. Cũ yere weemirã ãpẽrãrẽ ma'itica, Õ'acũ marĩrẽ “Añurõ weewu”, nitisami.

⁴ Marĩ ãpẽrãrẽ ma'irã, a'tiro wee'e. ãpẽrã marĩrẽ mejẽcã weecã, na weesere nu'cã'a. Nipe'tirãrẽ añurõ wee'e. ãpẽrãrẽ uowe'e. Musã ãpẽrãrẽ ma'irã, a'tiro niwe'e: “Musã nemorõ añuyu'runu'cãrã ni'i”, niwe'e. “ãpẽrã yu'rũoro añurõ weeyu'runu'cãrã ni'i”, niwe'e. ⁵ ãpẽrãrẽ ãjõpeose me'rã ucũ'u. Marĩ ye se'sarore wãcũwe'e. Uamũñawe'e. ãpẽrã marĩrẽ mejẽcã weecã, yoacã uanu'cũwe'e. ⁶ ãpẽrã ña'arõ weecã i'arã, e'catiwe'e. Na añurõ weecã pe'e, e'catitamu'u. ⁷ ãpẽrã na ña'arõ weesere ne cã'rõ wereturiawe'e. Na weesere añuse di-a'cũrẽ ãjõpeo'o. “Be'ropu añurõ weerãsama”, ni wãcũ'u. Nipe'tise ãpẽrã marĩrẽ ña'arõ weecã, wãcũtutua'a.

⁸ Ma'ise pe'tisome. Ninu'cũcã'rõsa'a. Apeye Õ'acũ marĩrẽ weemasĩse o'ose pũricã pe'tidijarosa'a. Be'ropu Õ'acũ cũ yere wereturiamasĩse o'ose quẽrã pe'tidijarosa'a. Nipe'tise cũ yere masĩpe'ocã'rãsa'a. Apemasã ye ucũsere masĩtimirã Õ'acũ ucũmasĩse o'ose quẽ'rã pe'tirosa'a. Nipe'tirã ucũse tu'ope'ocã'no'rõsa'a. ãpẽrã yu'rũoro masĩse o'o'que quẽ'rã pe'tirosa'a. Nipe'tisere masĩrãsa'a. ⁹ A'tiro ni'i. Marĩ sõ'owaro nipe'tisere masĩpe'owe'e. Õ'acũ ye quẽ'rãrẽ ni'cãrẽta weremasĩ'i.

¹⁰ Be'ropu Jesucristo apaturi a'ticã, masĩpe'ocã'rãsa'a. Marĩ masĩpe'ocãma, marĩ masĩmi'que mejõ nise to-jarosa'a.

¹¹ Marĩ wĩ'marã nĩrã, na weewaronojõ weewu. Bũcũrã wa'arã, wĩ'marã weesere du'ucã'wũ. Na wĩ'marã weese marĩrẽ wapamarĩ'i. ¹² Tojo weronojõ a'tocatero marĩ añurõ masĩwe'e. Ëorõ mejãrõpu marĩ i'ase weronojõ ni'i. Queoro bajuwe'e. Be'ro bajuyoropu Õ'acũrẽ i'arãsa'a. Ni'cãrõacãrẽ marĩ cã'rõacã masĩ'i. Be'ro cũ marĩrẽ masĩrõnojõta masĩpe'ocã'rãsa'a. ¹³ A'tiro nicãrẽ ëjõpeose, e'catiyuse, ma'ise ni'i. A'te i'tiario pe'tisome. Ma'ise pe'le apeye nemorõ añuyũ'rũnũ'cã'a.

14

Ãpẽrã ye ucũsere tũ'otimirã ucũrã, a'tiro weeroua'a nise ni'i

¹ Ãpẽrãrẽ ma'isere wãcũyũ'rũnũ'cãña. Tojo nicã Õ'acũ Espĩritu Santu me'rã weetamumasĩsere uaya. Ãpẽrã yere masĩtimirã ucũmasĩse Espĩritu Santu o'ose ni'i. Õ'acũ yere wereturiamasĩse quẽ'rã cũ o'oseta ni'i. Cũ o'osere wereturiamasĩsere uaripejayũ'rũnũ'cãña. ² No'o ãpẽrã ye ucũsere masĩtimigũ ucũgũnojõ Õ'acũ dia'cũrẽ ucũsami. Masãrẽ ucũtisami. Cũ ucũsere tũ'otisama. Espĩritu Santu tutuaro me'rã masĩno'ña marĩsere ucũsami. ³ Õ'acũ yere wereturiase pe'le masãrẽ ucũse ni'i. Tere wererã, marĩ ãpẽrãrẽ Õ'acũrẽ nemorõ ëjõpeocã wee'e. Na e'caticã, wãcũtutuacã wee'e. ⁴ No'o ãpẽrã yere masĩtimigũ ucũgũnojõ cũ se'saro Õ'acũrẽ nemorõ ëjõpeowã'cãgũ weesami. Õ'acũ ye quetire wereturiagu pe'le ãpẽrã Jesucristo ëjõpeorã nerẽwũari curuacjãrãrẽ nemorõ ëjõpeocã weenemosami. ⁵ Musã ãpẽrã yere masĩtimirã, nipe'tirã ucũmasĩcã uami'i. Te yũ'rũoro Õ'acũ yere wereturiamasĩse pe'ere uasãyũ'rũnũ'cãmi'i. Wereturiamasĩgũ pe'le

apĩ ãpẽrã yere masĩtimigũ ucũgũ nemorõ wapatimi. Ni'cũ ãpẽrã yere masĩtimigũ, ucũsami. Be'ro cũ ucũ'quere "A'tiro nisĩ'rĩrõ weearũ", ni wereturiacã, añu nisa'a. Tojo weregũ, nipe'tirã Jesucristore ãjõpeori curuacjãrãrẽ nemorõ ãjõpeocã weesami. ⁶ A'tiro ni'i. Yũ'u mũsã tiropũ wa'agũ, ãpẽrã yere ucũgũ, weetamutibosa'a. Õ'acũ yũ'ure masĩse o'osere bu'égũ pũrĩcã, weetamubosa'a. Mũsãrẽ Õ'acũ wereduti'quere wereturiagũ quẽ'rã, weetamubosa'a. Tojo nicã mũsãrẽ apeyere bu'enemogũ, weetamubosa'a.

⁷ Ni'cã queose bususe cjasere o'oña'gũti. Wẽowũ no'o ñaro putima'acã, ñe'enojõ basase nisari, nita basiowe'e. Buapũtẽrõ no'o ñaro buapũtẽcã, ñe'enojõ basase nisari, nita basiowe'e. ⁸ Surara a'mewẽjẽrã wa'arã, na putipjũre queoro putiticã, na yere apoyutisama. ⁹ Marĩ quẽ'rã tojota nisa'a. Marĩ queoro ucũticã, de'ro nirõ weesari, nita basiowe'e. Mejõ waro ucũma'acã'bosa'a. ¹⁰ "A'ti nucũcãpũre pejetiacã ucũse ni'i", nita basiowe'e. Nipe'tise te ucũsenũcũ tu'ota basio'o. ¹¹ Yũ'u ãpẽrã ucũsere tu'otigũ, aperocjũ weronojõ ni'i. Yũ'u apĩrẽ ucũcã, cũ quẽ'rã tu'otigũ, apesecjũ weronojõ nisami. ¹² Tojota ni'i mũsã quẽ'rãrẽ. Mũsã Espĩritu Santu tutuaro me'rã weemasĩse o'osere ña'a. Tere ñarã, a'tere ñaripejayũ'rũnũ'cãña. Jesucristore ãjõpeori curuacjãrãrẽ nemorõ añurõ ãjõpeocã weemasĩse pe'ere ñaripejayũ'rũnũ'cãña.

¹³ Tojo weerã no'o ãpẽrã yere masĩtimigũ ucũgũnojõ te ucũsere wereturiamasĩacjũ Õ'acũrẽ sẽrĩato. ¹⁴ Marĩ ãpẽrã ye ucũsere tu'otimirã ñubuerã, Espĩritu Santu weetamuse me'rã ñubue'e. Tojo weemirã, "A'tiro nirã wee'e", nĩmasĩtisa'a. Tojo weerã ãpẽrãrẽ weetamutibosa'a. ¹⁵ Marĩ ñubuerã, a'te pũarore weeroua'a. ãpẽrã yere masĩtimirã ucũse Espĩritu Santu o'ose me'rã ñubueroua'a. Tojo nicã marĩ wãcũse me'rã ñubueroua'a. Apeye quẽ'rãrẽ

Õ'acūrē basapeorã, mejārōta p̄aro me'rã basapeoroua'a tja. Āpērã yere masītimirã ucūse me'rã, tojo nicã marī ucūse useri me'rã basaroua'a. ¹⁶ Āpērã yere masītimirã ucūse me'rã dia'cū mu'u Ō'acūrē e'catise o'ocã, apī mu'u ucūsere tu'otibosami. Tu'otigu, “Tojota ni'i”, nitamumasītisami. ¹⁷ Mu'u e'catise o'ocã, aņu ni'i, aņurō pe'e. Cū pe'ere Ō'acūrē nemorō ējōpeocã weetisa'a. ¹⁸ Āpērã yere masītimigū ucūsere yu'uta musã nipe'tirã nemorō ucūyu'rūnu'cã'a. Tojo weegu Ō'acūrē e'catise o'o'o. ¹⁹ Tojo nimigū, Jesucristore ējōpeorã nerēwuaropu musã tu'otisere ucūcã, yu'u ucūse wapamarīsa'a. Yoacã āpērã ye ucūse me'rã ucūmigū, mejō waro ucūbosa'a. Musã tu'otibosa'a. Cã'rōacã nimicã, masã tu'ota basiose me'rã ucūcã pe'ere, tetã musārē aņu ni'i.

²⁰ Acawererã, Jesucristore ējōpeorārē musārē wereguti. Wī'marã tu'omasītima. Na weronojō wãcūticã'ña. B̄c̄urã weronojō wãcūsetiya. Wī'marã ña'arō weesetitirã weronojō wãcūña. ²¹ Ō'acū ye queti ojãca pūrīpu a'tiro ojano'wū: “Marī wioгу Ō'acū a'tiro nicu niwī: ‘Ējōpeotise bu'iri yu'u a'ti di'tacjārārē apemasã ye me'rã ucūgūti. Tojo weemicã, te me'rã quē'rārē ējōpeosome', nicu niwī.” ²² Tojo weegu Ō'acū masārē apemasã ye me'rã weregu, masã ējōpeotisere, cūrē yu'rūnu'cāsere ī'osami. Āpērã cūrē ējōpeorã pe'ere cū ye queti wererã me'rã yu'ure ējōpeorã nima nisere ī'osami.

²³ Musã nipe'tirã nerēwuaropu apemasã yere tu'omasītimirã ucūcã, Jesucristore ējōpeotirã sãjãbosama. Na sãjãjarã, musã ucūsere masītirã, “Maatirã weema”, nibosama. ²⁴ Musã nipe'tirã Ō'acū were'quere wereturiacã pe'ema, a'tiro weebosama. Jesucristore ējōpeotigu musã weesere ī'agū, “Yu'u ña'agū nisa'a”, ni tu'oña'bosami. ²⁵ Cū ña'arō wee'quere wãcūejagusami. Tojo weegu Ō'acūrē ējōpeogu

ejaque'agusami. “Õ'acũ diacjũta na me'rã nimi”, nigũsami.

Mũsã weesere wiopesase me'rã weeya nise ni'i

²⁶ Acawererã, mũsã weesetise a'tiro ni'i. Mũsã nerẽrã, ãpẽrã Õ'acũrẽ basapeosama. ãpẽrã Õ'acũ cjasere bu'esama. ãpẽrã Õ'acũ masĩcã wee'quere wereturiasama. ãpẽrã, ãpẽrã ye ucũsere tũ'otimirã, ucũsama. Na ucũsere ãpẽrã o na basu wereturiasama. Te me'rã nipe'tirã Jesucristore ãjõpeori curuacjãrãrẽ a'merĩ Õ'acũrẽ ãjõpeonemocã weeya. ²⁷ ãpẽrã ye ucũsere tũ'otimirã ucũrĩ masã pũarã o i'tiarãta ucũato. Ni'cũ ucũmũ'tã, be'ro apĩ ucũato. Na ucũsere apĩ wereturiato. ²⁸ Mũsã nerẽwũaropũ wereturiagu marĩcã, ucũtiyu'rũocã'to. Na se'saro wãcũsepũ Õ'acũrẽ ucũato. ²⁹ Õ'acũ weredutisere wereturiari masã quẽ'rã pũarã o i'tiarãta wereato. ãpẽrã na weresere beseato. “¿Diacjũta niti?” niato. ³⁰ Ni'cũ ucũrĩ cura Õ'acũ apĩ topũ dujigũre wereduticã, ucũmũ'tã'cũ di'tamarĩato. ³¹ Mũsã nipe'tirã Õ'acũ wereduti'quere wereturiamasĩ'i. Tojo weerã ni'cũ weremũ'tã, apĩ, apĩ wereturiawã'cãña. Tojo weecã, nipe'tirã masĩrãsama. Nipe'tirã wãcũtutuarãsama. ³² Mũsã Õ'acũ weredutisere wereturiarã, no'o ũaro ucũma'aticã'ña. Wãcũyu, “A'teta masãrẽ werecã, añutu'sa'a”, ni wereya. ãpẽrã ucũrĩ curare ucũticã'ña. ³³ Õ'acũ queoro weecã ũami. No'o ũaro weesere ũatimi.

Nipe'tirã Jesucristore ãjõpeorã nerẽrã, a'tiro weewũama. ³⁴ Mũsã nerẽrĩ curare numia ucũtiyu'rũocã'to. Narẽ ucũdutiticã'ña. Ucũrõnojõ o'orã, Õ'acũ ye queti ojãca pũrĩpũ duti'caronojõta añurõ yũ'tiatio. ³⁵ Na tũ'oti'quere masĩsĩ'rĩrã, wi'ipũ na marãpũsumũarẽ sãrĩtiña'to. Numia Jesucristore ãjõpeorã nerẽwũaropũ ucũcã, tũ'sawe'e.

³⁶ Mũsãrẽ masĩrõũa'a. Õ'acũ ye queti mũsã me'rã nu'cãticaro niwũ. Mũsã se'saro tere ãjõpeorã niwe'e. ³⁷ No'lo “Yũ'u Õ'acũ yere wereturiamasĩ'i, Espĩritu Santu wãcũse o'ose me'rã ucũ'u” nigũnojõ yũ'u ojasere “Marĩ wioꝑũ dutise ni'i”, nigũsami. ³⁸ Yũ'u oja'quere ãjõpeotigũre mũsã quẽ'rã cũrẽ ãjõpeoticã'ña.

³⁹ Acawererã, Õ'acũ yere wereturiamasĩsere uaya. ãpẽrãrẽ apemasã yere tu'otimirã na ucũcã, cã'mota'aticã'ña. ⁴⁰ Nipe'tise mũsã weesere no'lo uaro weema'aticã'ña. Wiopesase me'rã weeya.

15

Jesucristo masã'que ni'i

¹ Acawererã, yũ'u mũsãrẽ todũporoꝑũ bu'e'que Jesucristo masãrẽ yũ'ruose quetire ni'cãrõacã wãcũcã u'a. Mũsã tere tu'orã, ãjõpeowũ. A'tiro nicã quẽ'rãrẽ ãjõpeonu'cũ'u. ² Õ'acũ te añuse queti me'rã mũsãrẽ ãjõpeonu'cũcã weegũ weemi. Mũsãrẽ te queti yũ'u were'quere ãjõpeonu'cũcã, yũ'ruogũsami. Queoro mũsã ãjõpeocã, tojo weegũsami. Mũsã bu'ipũ dia'cũ ãjõpeorã, yũ'ruono'some.

³ Yũ'ure bu'e'quere mũsãrẽ wereturiauwũ. Te apeye yũ'ruoro niyũ'runũ'cãse a'tiro niwũ. Õ'acũ ye queti ojãca pũrĩpũ oja'caronojõta Cristo marĩ ña'arõ wee'quere cõ'asĩ'rĩgũ, wẽrĩbosacu niwĩ. ⁴ Cũ wẽrĩca be'ro cũrẽ yaacãrã niwã. Be'ro Õ'acũ ye queti ojãca pũrĩpũ oja'caronojõta i'tia nũmũ be'ro Õ'acũ cũrẽ masõcu niwĩ. ⁵ Tojo wẽeca be'ro cũ Pedrore, ãpẽrã cũ besecũú'cãrãrẽ bajuacu niwĩ. ⁶ Be'ro ni'cãti pãjãrã quinientos yũ'ruoro

cūrē ējōpeorārē bajuacu niwī. Pājārā cūrē ī'a'cārā cati-sama yujupu. Āpērā wērīatojacārā niwā. ⁷ Be'ro Santi-agore bajuacu niwī. To be'ro nipe'tirā cū besecúú'cārārē bajuacu niwī.

⁸ Be'ro nipe'tirā cūrē ī'aca be'ropu yu'ure bajuawī. Na be'rocjū yapatigūacāpū bajua'cu weronojō nimigū, cūrē ējōpeosirutu'u. ⁹ Yu'u nipe'tirā āpērā Jesucristo besecúú'cārā docapu ni'i. Yu'ure ne cārō “Jesu-cristo besecúú'cu nimi”, niticārōna'a. Yu'u Jesucristore ējōpeori curuacjārārē ña'arō wee'que bu'iri, tojo ni'i. ¹⁰ Tojo nimigū, Ō'acū yu'ure añurō weeyucā, Jesucristo besecúú'cu ni'i. Yu'ure mejō waro añurō weegu weet-imi. Yu'u nipe'tirā āpērā yu'rūoro da'ra'a. Yu'u se'saro tojo weewe'e. Ō'acū yu'ure añurō wéégū, yu'u me'rā ninu'cūmi. Yu'ure weetamumi. ¹¹ Yu'u bu'ese, tojo nicā āpērā cū besecúú'cārā na bu'ese ni'cārōnojō ni'i. Jesucristo wērī masā'que queti ūsā bu'ese ni'i. A'tereta mūsā ējōpeowu.

Wērī'cārā na masāmujāatje ni'i

¹² Ūsā Cristo wērī masā'que quetire bu'ewu. Tere bu'emicā, ¿de'ro weerā mūsā ni'cārērā “Wērī'cārā masā-tima”, nisari? ¹³ “Wērī'cārā masātima” nicāma, Cristo quē'rā masātibopī. ¹⁴ Cū masāticāma, ūsā bu'ese wapamarībopā. Mūsā ējōpeose quē'rā wapamarībopā. ¹⁵ Ō'acū Cristore masōcu niwī nise quetire werewu. Mūsā “Wērī'cārā masātima” nicā, ūsā te quetire wererā, nisoorā weebosa'a. Diacjūta wērī'cārā masāticāma, Ō'acū Cristore masōtibopī. ¹⁶ A'tiro ni'i. Wērī'cārā masāticāma, Cristo quē'rā masātibopī. ¹⁷ Cūrē masōticā, mūsā ējōpeose wapamarībosa'a. Todūporo mūsā ña'arō wee'quere mejārōta acobocono'tirā nibosa'a. ¹⁸ Jesucristore cū pacu masōticāma, cūrē ējōpeorā wērīrā, cūrē ējōpeotirā

weronojõ pecame'lepũ wa'abosama. ¹⁹ “Wẽrĩ'cārã masãsome” nise diacjũ nicãma, marĩ “Masārãsama” nĩrã, marĩta ãpẽrã yu'rũoro pajasecũorã waro nibosa'a. Mejõ waro ẽjõpeoma'abosa'a.

²⁰ “Wẽrĩ'cārã masãtima” nise diacjũ niwe'e. “Cristo masãcũ niwĩ” nise pe'e diacjũ ni'i. Cristo ãpẽrã nipe'tirã wẽrĩ'cārã dũporo masãmũ'tãcũ niwĩ. Marĩ quẽ'rã wẽrĩ'cārãpũ masārãsa'a. ²¹ A'tiro ni'i. Ne warocjũpũ Adã ña'arõ weenu'cã'que bu'iri marĩ nipe'tirã wẽrĩ'dijarãsa'a. Be'ro Cristo añũrõ weese bu'iri wẽrĩ'cārãpũ nimirã, masãmũjãarãsa'a tja. ²² Marĩ nipe'tirã Adã põ'rã nise ye bu'iri wẽrĩrãsa'a. Cristo yarã nĩrã pe'e marĩ cũrẽ ẽjõpeorã, catinu'cũrãsa'a. ²³ Marĩ masārã, queoro masārãsa'a. Cristo masãmũ'tãtojacũ niwĩ. Be'ro cũ apaturi a'ticã, marĩ cũ yarã masārãsa'a. ²⁴ Tojo wa'acã, a'ti mũcũco pe'tia wa'arosa'a. Titare Cristo nipe'tirã wiorã tutuarãrẽ, bajutirãrẽ, bajurãrẽ cõ'ape'ocũsami. Cũ tojo weetu'ajaca be'ro cũ pacũre cũ nipe'tirã wiogu nisere wiagũsami. ²⁵ Tojo wiasẽ dũporo Õ'acũ Cristore ĩ'atu'tirãrẽ docaque'acã weegũsami. Tojo weegu Cristo nipe'tirã bul'ipũ tojagũsami. ²⁶ Cristore ĩ'atu'tirãrẽ docaque'acã wéeca be'ro wẽrĩse quẽ'rã marĩrõsa'a. ²⁷ Õ'acũ cũ ye queti ojãca pũrĩpũ nĩrõnojõta nipe'tisere, nipe'tirãrẽ Cristo docapũ tojacã weecũ niwĩ. Tojo nĩrõ, “Õ'acũ Cristo docapũ nimi”, nĩrõ mejẽta we'e. Õ'acũta nipe'tisere, nipe'tirãrẽ Cristo docapũ tojacã weecũ niwĩ. ²⁸ Õ'acũ tojo tojacã wéeca be'ro Cristo Õ'acũ macũ, cũ basu cũ pacũ doca tojagũsami. Tojo weegu Õ'acũ nipe'tise, nipe'tirã wiogu nigũsami.

²⁹ Apeyere ãpẽrã a'tiro weesama. Wẽrĩ'cārã ye wapa wãmeyebosadutisama. “Wẽrĩ'cārã masãtisama” nicãma, tojo weeno'ña marĩbosa'a.

³⁰ Apeyere, mũsã bu'ese bu'iri nipe'tise mũmũrĩ ãpẽrã

ña'arõ weesĩ'rĩma. Tojo wiose wa'teropu nimirã, wẽrĩ'cãrã masãtjere wãcũrã, bu'enu'cũ'u. ³¹ Diacjũta yu'u musã marĩ wioꝝ Jesucristore ãjõpeose ye bu'iri e'cati'i. A'te quẽ'rã diacjũta ni'i. Nipe'tise nũmũrĩ “Masã yu'ure wẽjẽrãsama”, ni tu'oña'a. ³² Yu'u Jesucristo ye quetire werese bu'iri Éfesocjãrã yu'ure wa'icũrã yaiwa weronojõ ña'arõ weewã. “Wẽrĩ'cãrã masãsome” nicã, mejõ waro na weesere pi'etibopã. “Wẽrĩ'cãrã masãsome” nise diacjũ nicãma, marĩ quẽ'rã ãpẽrã ucũwũaronojõ ucũbosa'a. A'tiro nibosa'a: “Te'a ba'arã, te'a sĩ'rĩrã. Maata wẽrĩdojarãsa'a. Marĩ wẽrĩati dũporo weewe'orã”, nibosa'a.

³³ ãpẽrã musãrẽ mejẽcã ãjõpeoduticã, ãjõpeoticã'ña. Masã ucũwũase a'tiro ni'i: “Ña'arã me'rã ba'paticã, añurõ weese dojosa'a.” ³⁴ Tojo weerã tu'omasĩña. Musã todũporo ni'caronojõ wiopesase me'rã queoro weeya tja. Ña'arõ weeticã'ña. Ni'cãrẽrã Õ'acũrẽ masĩwe'e. Musãrẽ bopoyadutigũ tojo ni'i.

Wẽrĩ'cãrã masãmũjãatjere werenemose ni'i

³⁵ Apetero ni'cũ “Wẽrĩ'cãrã masãtima” nisere ãjõpeoꝝ, a'tiro sãrĩtiña'bosami: “Wẽrĩ'cãrã ¿de'ro wee masãta basiobosari? Na masãrã, ¿de'ro bajuri upũ cũorãsari?” ³⁶ Cũ tojo sãrĩtiña'ma'acã'bosami. Marĩ otese peri otecã, te peri pĩ'rĩatji dũporo boadijasa'a. ³⁷ Marĩ pĩ'rĩdũtirã pĩ'rĩmũjã'cũ mejẽtare ote'e. Te peri pe'ere trigo o no'lo otese nisere pĩ'rĩdũtirã ote'e. ³⁸ Be'ro Õ'acũ cũ ã'caronojõ pĩ'rĩcã weesami. No'lo de'ro bajuse dũca ni'que tenojõta tja pĩ'rĩcã weesami. ³⁹ Nipe'tirã catisere cũorã ni'cãrõnojo bajurã nitima. Masã ye upũ wa'icũrã ya upũ weronojõ bajuwe'e. Mirĩcũa ya upũ quẽ'rã mejẽcã baju'u. Wa'i quẽ'rã mejẽcã upũtima. ⁴⁰ A'te dũcawatiro weronojõ u'mũsecjãrã quẽ'rã mejẽcã upũtima. A'ti di'tacjãrã mejẽcã upũtima. U'mũsepu

nirá añubutiari upu cɔoma. A'ti nucũcãpũ nirá quẽ'rã tojota cɔoma. Ɖ'mũsecjãrã, a'ti nucũcãcãrã weronojõ nitima. ⁴¹ Mujĩpũ ɛmũcocjũ ñamicjũ weronojõ, tojo nicã ñocõa weronojõ bo'reyutimi. Ñocõa quẽ'rã ni'cãrõnojõ bo'reyutisama. ⁴² Á'rã nipe'tirã weronojõ wẽri'cãrã masãcã, tojo wa'arosa'a. Wẽri'cãrãrẽ yaacã, na upu boarosa'a. Be'ro ape upu pe'titiatji upu masõno'rõsa'a. Masõca be'ro apaturi wẽrinemosome. ⁴³ Marĩ mejõ nirĩ upure yaa'a. Masãrõpũ tja ape upu añubutiari upu nirõsa'a. Marĩ tutuatiri upure yaacõ'a'a. Masãca be'ropure ape upu tutuari upu nirõsa'a. ⁴⁴ Marĩ a'ti upure yaacõ'a'a. Masãca be'ro ɛ'mũse cja upu pe'titiatji upu nirõsa'a. Tojo weerã masĩno'o. Marĩ a'ti upure cɔorã, ape upu pe'titiatji upu cɔorãsa'a.

⁴⁵ Õ'acũ ye queti ojãca pũrĩpu a'tiro ojano'o: "Õ'acũ cũ weemũ'tã'cũ Adãrẽ catisere o'ocũ niwĩ." Cũ be'rocjũ Jesucristo pe'e catise pe'titise warore o'ogu nimi. ⁴⁶ A'ti upu cjase catise marĩ cɔomũ'tãse ni'i. Apeye catise be'ro cjase ni'i. Te ɛ'mũse cja upu cjase pe'titiatje ni'i. ⁴⁷ A'ti nucũcãpũre masũ nimũ'tã'cũ di'ta me'rã yeeno'cũ niwĩ. Cũ be'rocjũ Cristo ɛ'mũsecjũ nimi. ⁴⁸ A'ti di'tacjãrã ne warocjũ di'ta me'rã weeno'cũ weronojõ upũtima. Jesucristo e'jõpeorã pe'e ɛ'mũsepũ wa'ajã ɛ'mũsecjũ weronojõ upũtima. ⁴⁹ Adã di'ta me'rã yeeno'cũ niwĩ. Marĩ cũ weronojõ upũti'i. Mejãrõta be'ropũ ɛ'mũsecjũ Cristo weronojõ upũtirãsa'a.

⁵⁰ Acawererã, a'tiro ni'i. Marĩrẽ a'ti upu me'rã ɛ'mũsepũ wa'ata basiowe'e. Boadijatji upu ni'i. Ti upu ninu'cũmasĩtisa'a. ⁵¹⁻⁵² Apeye quẽ'rã todũporo masĩno'ña marĩ'quere wereguti. Nipe'tirã wẽrisome. Jesucristo a'tiri cura Õ'acũrẽ wereco'tegu ɛ'mũsecjũ Õ'acũ yaro coronetare putigusami. Tojo wa'acã, ɛmũñarõ

cārīwā'cāmajārā weronojō marī nipe'tirā Jesucristore ējōpeorā ape upu ducayurāsa'a. Wērī'cārā ape upu pe'ti-tiatji upu me'rā masārāsama. Catirā quē'rā mejārōta ducayurāsama. ⁵³ Marī ya upu boawuari upu pe'titiati upu wa'arosa'a. Ducayu, catinu'cūcā'rōsa'a. ⁵⁴⁻⁵⁵ Marī pe'titiati upu ducayucā, Ō'acū ye queti ojāca pūrīpu nīrōnojōta wa'arosa'a. A'tiro ni ojano'o: “Marī wērīsere docaque'acā weetoja'a. Ne apaturi wērīnemosome majā. Wērīrā pi'etisere tū'oña'some.” ⁵⁶ Marī űa'arō weese bu'iri wērīrī masā ni'i. Te marī űa'arō weesere Ō'acū Moisére dutise cū'que me'rā masīno'o. űa'arō wéérā, marī pecame'epu wa'abopā. ⁵⁷ Tere cā'mota'agu, Ō'acū pe'e a'tiro weecu niwī. Marī wioḡu Jesucristo me'rā pecame'epu wa'abo'cārārē yu'ruocu niwī. Tojo weerā Ō'acūrē e'catise o'orā.

⁵⁸ Acawerērā, a'tere wācūrā, ējōpeonu'cūcā'ña. Marī wioḡu yere siape me'rā nemorō weenemoña. Mūsā masī'i. Cū yere wéérā, tojowaro weebutiarā weewe'e. Wapati'i.

16

Corintocjārā Jerusalépu nirārē niyeru o'orātirā sērīneose ni'i

¹ Mūsā Jesucristore ējōpeorārē niyeru sērīneosema yu'u Galaciacjārārē duti'caronojōta weeya. A'tiro niwū:
² “Soorinūmurē niḡu'tārī nūḡu semanarīnucū mūsā wapa-ta'aro ejatuaro apesepu nūrōña.” Mūsā tojo weeyurā, yu'u etari curapu o'osī'rīrā da'rama'acūñasome. ³ Yu'u mūsā tiropu etagu, mūsā beserārē Jerusalépu o'óguti. Narē o'ógu, yu'u ojāca pūrīpūre “Ā'rā nima Corintocjārā bese'cārā”, ni ojaguti. Na me'rā ti pūrīrē, tojo nicā niyerure Jerusalécjārā Jesucristore ējōpeorārē o'óguti.
⁴ “Yu'ure wa'aroua'a” nicāma, na yu'u me'rā wa'arāsama.

Pablo Corintopu cū wa'atjere apoyuse ni'i

⁵ Yu'u topu wa'agu, Macedonia di'tapu yu'ruagusa'a. To yu'rua, musã tiropu etagusa'a. ⁶ Apetero weegu musã me'rã yoacã nigusa'a. Nipe'tiro pu'ecu nígũ, nipe'ocusa'a. Be'ro, musã apero no'lo yu'u wa'asi'rígũ wa'atjere weetamumasírãsa'a. ⁷ Yu'u musãrẽ mejõ waro í'ayu'ruwãcãsi'rítisa'a. Marí wioгу Jesucristo uacã, musã tiropure yoacã tojasí'rísa'a. ⁸ Pentecosté bosenuumu nicã a'to Éfesopu níningũti yujupu. ⁹ A'tore peje da'rase ni'i. Pãjãrã marí wioгу ye quetire tu'osí'ríma. Tere cã'mo-ta'asi'rírã quẽ'rã pãjãrã nima.

¹⁰ Timoteo musã tiropu etacã, cũrẽ weetamuña. Tojo weecã, cũ wãcũque'tiro marĩrõ, bujawetiro marĩrõ nigũsami. Cũ yu'u weronojõ marí wioгу yere da'rami. ¹¹ Tojo weerã musã cũrẽ mejõ waro í'acõ'aticã'ña. Cũ a'topu a'tiatjere weetamuña. Tojo weecã, cũ e'catise me'rã yu'u tiropu a'tigusami. Yu'u ãpẽrã Jesucristore ãjõpeorã me'rã cũrẽ yucuegu wee'e.

¹² Apoloma yu'u uputu waro musã tiropu í'agũ wa'adu-timiwũ. Cũrẽ marí acawererã me'rã wa'adutimiwũ. Cũ ni'cãrõacãrẽ wa'asi'rítimi. Cũrẽ wa'lata basiocã, be'ro wa'agusami.

Pablo Corintocjãrãrẽ añudutituo'que ni'i

¹³ Musã añurõ tu'omasíña. Ëjõpeodu'uticã'ña. Ne uiro marĩrõ niña. Tojo nírá, Õ'acũ tutuase me'rã niña.

¹⁴ ãpẽrãrẽ ma'inu'cũcã'ña.

¹⁵ Ni'cãrõacãrẽ, acawererã, a'tere musãrẽ weresí'rísa'a. Estéfnas ya wí'icjãrãta niwã Acayapure ãpẽrã duporo Jesucristore ãjõpeomu'tã'cãrã. Na Jesucristore ãjõpeorãrẽ uputu waro weetamuma. ¹⁶ Na weronojõ weesetirãnojojõrẽ na dutisere yu'tiya. Tojo nicã nipe'tirã Cristo yere da'rarã na dutisere weeya. ¹⁷ Musã me'rãcãjãrã Estéfnas, Fortunato, Acaico a'topu ejacã, pũrõ e'catiwu. Na musã yu'ure weetamubo'quere weema. ¹⁸ Yu'ure ejerisãjãcã weewã.

Mũsã quẽ'rãrẽ tojota weerãsama. Tojo weerãrẽ “Añurõ weerã weema”, nirõũa'a.

¹⁹ Asia di'tacjãrã Jesucristore ãjõpeori curuacjãrã mũsãrẽ añudutima. Aquila, Priscila, na ya wi'ipũ nerẽwuarã quẽ'rã Jesucristore ãjõpeorã nitjãrã, pũrõ añudutio'oma. ²⁰ Nipe'tirã Jesucristore ãjõpeorã mũsãrẽ añudutima. Mũsã e'catise me'rã a'merĩ añudutiya.

²¹ A'te nitũose daripũre mũsãrẽ añudutigu yũ'ũ basuta oja'a.

²² No'lo marĩ wiogũ Jesucristore ma'itigũre ña'arõ wa'ato. “Ûsã wiogũ, quero a'tibaque'oya.”

²³ Jesucristo marĩ wiogũ mũsãrẽ añurõ weeato. ²⁴ Marĩ nipe'tirã Jesucristo yarã ni'i. Tojo weegũ mũsãrẽ ẽpũtu ma'i'i. Tojota wa'ato.

Tocã'rõta oja'a.

Pablo

Õ'âkã hi yeere uúkũri turi Tukano
New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

